

三

社121
673
部大:80



文獻通考卷第三百十一



鄱陽馬端臨貴與著

物異考十七

毛蟲之異

周穆王征犬戎得四白狼四白鹿以歸自是荒服者不至

春秋莊公十七年冬多麋劉歆以為毛蟲之孽為災劉向以為麋色青屬青祥麋之為言述也蓋牝獸之淫者時莊公將取齊之淫女天戒若曰勿取齊女淫而逃國不悟卒取之其後淫于二叔慶父叔牙終皆誅死幾亡社稷

董仲舒指略同京房易傳曰廢正作淫大不明國多麋
漢明帝時昌邑王賀聞人聲曰熊視而見大熊左右莫
見以問郎中龔遂遂曰熊山野之獸而來入宮室王獨
見之此天戒大王恐宮室將空危亡象也賀不改悟後
卒失國

後漢章帝建初七年獲白鹿 安帝延光三年扶風言
白鹿見雍頰川言白鹿及白虎二見陽翟 順帝陽嘉
元年十月中望都蒲陰狼殺童兒九十七人時李固對
策引京房易傳曰君將無道害將及人去之深山全身
厥災狼食人陛下覺悟比求隱滯故狼災息 桓帝永

興元年張掖言白鹿見 延禧五年驚馬逸象突入宮
殿 永康元年西河言白兔見 靈帝建寧中羣狼數
十頭入晉陽南城門齧人 光和三年正月虎見樂平
觀又見憲陵上齧衛士蔡邕封事曰政有苛暴則虎狼
食人

魏明帝青龍四年司馬懿獲白鹿獻之

吳孫權赤烏六年新都言白虎見 九年五月鄱陽言

虎仁

瑞應圖曰仁者王者不
暴虐則虎仁不害也

晉武帝太康六年南陽獻兩足猛獸此毛蟲之孽也識
者爲其文曰武形有虧金獸失儀聖主應天斯異何爲

言兆亂也京房易傳曰足少者下不勝任也干寶以爲獸者陰精居於陽金獸也南陽火名也金精入火而失其形王室亂之妖也六水數言水數旣極火慝得作而金受其敗也至元康九年始殺太子距此十四年二十七十四火始終相乘之數也自帝受命至愍懷之廢凡三十五年焉 七年十一月景辰四角獸見於河間河間王顥獲之以獻天戒若曰角者兵象也四者四方之象當有兵亂起於四方後河間王遂連四方之兵作爲亂階殆其應也 懷帝永嘉五年蠃鼠出延陵郭景純筮之曰此郡東之縣當有妖人欲稱制者亦尋自死矣其

後吳興徐馥作亂殺太守袁琇馥亦時滅是其應也

成帝咸和六年正月丁巳會州郡秀孝於樂賢堂有麀

居筠反

見於前獲之孫盛以爲吉祥夫秀孝天下之彥士

樂賢堂所以樂養賢也自喪亂以後風教陵夷秀孝策試四科之實麀興於前或斯故乎 哀帝龍和元年十月甲申有麀入東海第百姓謹言曰主入東海第識者怪之及海西廢爲東海王乃入其第 孝武太元十三年四月癸巳祠廟畢有兔行廟堂上天戒若曰兔野物而集宗廟之堂不祥莫之甚焉

石虎時郡國前後送蒼麟十六白鹿七虎命司虞張

曷柱調之以駕芝蓋列於充庭之乘
苻堅末年猛獸及狼食人行路斷絕

苻生既立猛獸及狼大暴晝則斷道夜則發屋惟害人而不食六畜一年殺七百餘人百姓苦之皆聚而邑居爲害滋甚遂廢農業內外洵懼

慕容超祀南郊將登壇有獸大如馬狀類鼠而色赤集於園丘之側俄而不知所在須臾大風暴起天地晝昏其行宮羽儀皆振裂

宋文帝元嘉二十八年秋猛獸入郭內爲災

梁武帝天監六年三月有三象入建鄴 中大同元年

邵陵王綸在南徐州卧內方晝有狸鬪於擱上墮而獲之至太清中侯景之亂將兵援臺城至鍾山有蟄熊無何至齧綸所乘馬毛蟲之孽也綸尋爲王僧辨所敗亡南陽爲西魏所殺 中大同中每夜狐鳴闕下數年乃止京房易飛候曰野獸羣鳴邑中且空虛俄而國亂丹陽死喪略盡 元帝承聖元年十二月淮南有野象數百壞人室廬宣城郡猛獸暴食人
陳後主禎明中狐入牀下捕之不獲京房易飛候曰狐入君室室不居未幾而國滅

魏明元帝神瑞二年射白熊於頽牛山獲之 太武太

延元年白兔見於渤海

東魏孝靜武定三年九月豹入鄴城南門格殺之 五年八月豹又上銅爵臺京房易飛候曰野獸入邑及至朝廷若道上官府門有大害君亡是歲東魏師敗於玉璧神武遇疾崩

北齊後主武平二年有兔出廟社之中京房易飛候曰兔入王室其君亡按廟者祖宗之神室也後五歲周師入鄴後主東奔 三年鄴都并州並有狐媚多截人髮

武平中朔州府門外無何有小兒腳跡又擁土爲城雉之狀時人怪而察之乃狐媚所爲漸流至并鄴與武

定三年同占是歲南安王思好起兵於北朔直指并州爲官軍所敗鄭子饒羊法髡等復亂山東 武平末并鄴諸州多狼而食人洪範五行傳曰狼貪暴之獸大體以白色爲主兵之表也又似犬近犬旤也京房易傳曰君將無道害將及人去之深山以全身厥妖狼食人時帝任用小人競爲貪暴殘賊人物食人之應尋爲周軍所滅兵之象也

隋煬帝大業四年張掖獲元狐

唐高宗永徽中河源軍有狼三晝入軍門射之斃 永淳中嵐勝州兔害稼千萬爲羣食苗盡兔亦不復見

元宗開元三年有熊晝入揚州城 肅宗乾元二年十月詔百官上勤政樓觀安西兵赴陝州有狐出於樓上獲之 代宗大歷四年八月己卯虎入京師長壽坊宰臣元載家廟射殺之虎西方之屬威猛吞噬刑戮之象六年八月丁丑獲白兔於太極殿之內廊占曰國有憂白喪祥也 德宗建中三年九月己亥夜白虎入宣陽里傷人三詰朝獲之 貞元二年乙丑有野鹿至含元殿前獲之壬申又有鹿至含元殿前獲之占曰有大喪 四年三月癸亥有鹿至京師西市門獲之 八年正月鄂州獻白鹿 憲宗元和十年五月臨碧院使奏

壽昌殿南獲白鹿麇進之 穆宗長慶二年五月有自吐蕃至者稱隴上自去歲以來出異獸如猴而腰尾皆長色青迅猛見蕃人卽捕而食之遇漢人則否

開成四年四月有麇出於太廟獲之 昭宗天祐元年九月汴州進白兔

後漢隱帝乾祐二年五月潁州進白兔 三年正月有狐出明德門獲之比常狐毛長腹剩二足五月太白進白兔

後周世宗顯德三年潁州進白兔

南漢劉鋹時有野獸觸宮中寢門

宋太祖建隆三年五月有象至黃州黃陂縣匿林木中食民苗稼又至安復襄唐州踐民田頗爲患遣使捕之明年十二月於鄧州南陽縣獲之獻其齒革 乾德二年五月有象至澧州安鄉澧陽等縣又有象涉江入岳州華容縣直過闌闌十月又有象至澧州澧陽縣城北五年有象自至京師 羣臣表賀以爲巨獸由遠方而來國家當撫有海南之兆也未 幾廣南平 開寶八年四月陝州平陸縣鷲獸傷人遣使捕之生獻數頭十月江陵府白晝虎入市傷二人 太宗太平興國三年果閬蓬集州虎爲害遣殿直張延鈞捕之獲百數俄而巴州七盤縣虎傷人延鈞又獲七以皮

爲獻 七年越州虎入蕭山縣民趙訓家害八口 雍熙四年五月有犀自黔南入萬州民捕殺之獲其皮角 淳化元年十月桂州虎傷人詔遣使捕之 至道元年六月鳳州梁泉縣虎傷人 二年九月蘇州虎夜入福山寨食守卒四人 真宗咸平二年十二月黃州長折村二虎夜鬪一死食之殆半占云守臣災明年知州王禹偁卒 六年十月乙丑有狐出皇城東北角樓歷軍器庫至夾道獲之潭州獻白鹿潁州獻白麕單州獻白麕開封府大唐縣獻黑兔沂州獻紫兔 大中祥符元年五月封禪經度制置使王欽若言泰山舊多虎自

興功以來雖屢見而未嘗傷人悉相率入徂徠山而去
九年三月杭州浙江側有虎入稅場巡檢俞仁祐揮
戈殺之 神宗熙寧元年九月撫州獲白兔十二月嵐
州獲白鹿 四年九月廬州獲白兔 徽宗政和五年
十二月安化軍獲白兔 宣和元年二月淄川獲黑兔
七年秋有狐由良嶽直入御中據御榻而坐詔毀狐
王廟狐與胡同音 高宗紹興十年春有野豕入海州
市民刺殺之時州陷虜夏鎮江軍帥王勝攻取之明年
和戎以其郡屬虜悉空其民渡江後二十年有二虎入
城人射斃之虎亦搏人明年魏勝舉州來歸亦徙民如

昔虎豕皆毛孽也漢志龔遂曰野獸入宮室宮室將空
危亡象也 十一年隨州大洪山有跛虎久爲人患近
毛孽也 十三年南康縣雷雨羣狸震死岩穴中岩石
爲碎 紹興中句容縣有狸毛色如虎 孝宗乾道七
年湖州野象數百爲羣秋成食稼農設穿田間象不得
食率其羣圍行道車馬保伍積穀委之乃解圍 淳熙
二年江州馬當山羣狐掠人 十年滁州有熊虎同入
樵民舍夜自相搏死 光宗紹熙元年三月臨安府民
家猫生子一首八足二尾 四年鄂州武昌縣虎爲人
患虎西方之屬威猛吞噬刑戮之象 五年八月揚州

獻白兔侍御史章穎劾守臣錢之望以孽為瑞坐黜占
曰國有憂白喪祥也與唐大歷六年獲白兔同占是歲
光宗皇帝晏駕 寧宗慶元三年德興縣羣狐入民舍
皆毛孽也

麒麟 騶虞

春秋哀公十四年春西狩于大野叔孫氏之車子鉏商
獲麟 大野在高平鉅野 東北大澤是也 以為不祥以賜虞人仲尼觀之
曰麟也然後取之 公羊傳何以書記異也何異爾非
中國之獸麟者仁獸也有王者則至無王者則不至有
以告者曰有麇而角者孔子曰孰為來哉反袂拭面涕

沾袍曰吾道窮矣

麟太平之符聖人之類時得麟而死此亦天告夫子將沒之徵故云爾

穀梁傳西狩獲麟引取之也

言引取之者解經言獲也傳例曰諸獲者皆不

與也今言獲麟自為孔子來魯引而取之亦不與魯之辭也

狩地不地不狩也非狩

而曰狩大獲麟故大其適也

適猶如也之也非狩而言狩大得麟故以大所如者

名之也且實狩當言冬不當言春

其不言來不外麟於中國也不言有

不使麟不恒於中國也

漢武帝元狩元年冬十月行幸雍祠五時獲白麟作白
麟之歌

後漢明帝永平十一年麒麟出 安帝延光三年潁川

言麒麟見陽翟 四年東郡言麒麟見濮陽

吳孫權赤烏元年武昌言麒麟見

晉武帝泰始元年郡國言麒麟見 二年麒麟又見

咸寧五年二月甲午白麟見於平原九月甲午麒麟見

於河南 太康元年四月白麟見於頓邱 愍帝建興

二年麟見於襄平 成帝咸和八年麒麟騶虞見於遼

東

石虎時郡國送蒼麟十六

詳見毛蟲之異

梁武帝天監十年荊州言騶虞見

隋文帝開皇四年渝州獲獸似麋一角四蹄

唐高宗龍朔三年十月十六日絳州麟見二十六日含

元殿前麟趾見至來年改麟德 憲宗元和七年十一

月梓州上言龍州界嘉禾生有麟食之每來一鹿引之

羣鹿隨焉光華不可正視使畫工就圖之并嘉禾一函

以獻 文宗太和元年十一月河中奏當管虞鄉縣有

白虎入重峯觀按瑞應圖義獸也一名騶虞王者德至

鳥獸澤同幽冥則見

蜀王建元年騶虞見武定 三年十月麟見璧州

永平二年六月麟見文州 三年正月麟見永泰五

月騶虞見璧山有二鹿隨之 四年麟見昌州

宋太宗太平興國九年嵐州獻牡獸一角似鹿無斑文

角端有肉性馴詔羣臣參驗有散騎常侍徐鉉等援引國史以爲麟上言曰案春秋曰麇身而有角者麟也春秋感精符曰麟一角者明海內同一主也公羊傳曰上有聖帝明王天下太平則麟見今國海內一統故仁獸出實王者之大瑞宰相宋琪李昉等同其義皆奉表稱賀 徽宗雍熙二年閏九月坊州獻一角獸如嵐州麟而牡瑞應圖云牡曰麒麟牝曰麟 政和五年重和元年宣和二年三年 寧宗慶元三年俱有牛生麒麟事詳見

牛異

馬異

伏犧氏有天下龍馬負圖出於河遂法之以畫八卦註龍而形象馬也

左氏傳定公十年宋公子地有白馬四公嬖向魍魎欲之公取而朱其尾鬣以予之地怒使其徒扶魍而奪之魍懼將走公閉門而泣之目盡腫公弟辰謂地曰子爲君禮不過出境君必止子地出奔陳公不止辰爲之請弗聽辰曰是我誑吾兄也我與國人出君誰與守遂與其徒出奔陳明年俱入於蕭以叛大爲宋患近馬禍史記秦孝公二十一年有馬生人昭公二十年牡馬生子而死劉向以爲皆馬禍也孝公始用商君攻守之法

東侵諸侯至於昭王用兵彌烈師古曰其象將以兵革

抗極成功而還自害也牡馬非生類妄生而死猶秦恃

力彊得天下而還自滅之象也一日諸畜生非其類子

孫必有非其姓者至於始皇果呂不韋子京房易傳曰

方伯分威厥妖牡馬生子亡天子諸侯相伐厥妖馬生

人

漢文帝十二年有馬生角於吳角在耳前上鄉右角長

三寸左角長二寸皆大二寸劉向以為馬不當生角猶

吳不當舉兵向上也時吳王濞封有四郡五十餘城內

懷驕恣後卒舉兵誅滅京房易傳曰臣易上政不順厥

妖馬生角茲謂賢士不足又曰天子親伐馬生角武

帝元鼎四年秋馬生渥洼水中李斐曰南陽新野有暴

田燉煌界數於此水旁見羣野馬中有奇者與凡馬異

來飲此水利長先作土人持勒鞞於水旁後馬玩習久

之代土人持勒鞞收得其馬獻之作天馬之歌 太初

四年春貳師將軍李廣利斬大宛王首獲汗血馬來應

曰大宛舊有天馬種蹋石汗血汗從前肩膊出如血號

一日千里師古曰蹋石謂蹋石而有跡言其蹏堅利

作西極天馬之歌 成帝綏和二年二月大廐馬生角

在左耳前圍長各二寸時王莽為大司馬害上之萌自

此始矣 哀帝建平二年定襄牡馬生駒三足隨羣飲

食太守以聞馬國之武用三足不任用之象也後侍中

董賢年二十二爲大司馬居上公位天下不宗哀帝暴崩太后收賢印綬賢自殺王莽代之

後漢更始二年二月車駕發雒陽欲之長安司直李松奉引車奔觸北宮鐵柱門三馬皆死馬禍也時更始失道將亡 桓帝延禧五年四月驚車與逸象突入宮殿近馬旤也時桓帝政衰缺 靈帝光和元年司徒長史

馮巡馬生人

風俗通曰巡馬生胡子問養馬胡蒼頭乃奸此馬以生子

京房易傳曰

上亡天子諸侯相伐厥妖馬生人後馮巡遷甘陵相黃巾初起爲所殘殺而國家亦四面受敵其後關東州郡舉兵相攻天子西移王政隔塞其占與京房同 光和

中雒陽水西橋民馬逸走遂齧殺人時公卿大夫及左右數有被誅者

晉武帝太康元年遼東有馬生角在兩耳下長三寸按劉向說曰此兵象也及帝晏駕之後王室毒於兵禍是其應也京房易傳曰臣易上政不順厥妖馬生角茲謂賢士不足又曰天子親伐馬生角呂氏春秋曰人君失道馬有生角及惠帝踐祚昏愚失道又親征伐成都是其應也 惠帝元康八年十二月皇太子將釋奠太傅趙王倫驂乘至南城門馬止力推之不能動倫入軺車乃進此馬禍也天戒若曰倫不知義方終爲亂逆非傳

導行禮之人也 九年十一月戊寅忽有牡騮馬驚奔至廷尉訊堂悲鳴而死天戒若曰愍懷冤死之象也見廷尉訊堂其天意乎 懷帝永嘉六年二月神馬鳴南城門 愍帝建興二年九月蒲子縣馬生人京房易傳曰上亡天子諸侯相伐厥妖馬生人是時帝室衰微不絕如線胡狄交侵兵戈日逼尋而帝亦淪陷故此妖見也 元帝太興二年丹陽郡吏濮陽演馬生駒兩頭自項前別生而死司馬彪說曰此政在私門二頭之象也 其後王敦陵上 成帝咸康八年五月甲戌有馬色赤如血自宣陽門直走入於殿前盤旋走出尋逐莫知所在已卯帝不豫六月崩此馬旣又赤祥也是年張重華在涼州將誅其西河相張祚廐馬數十匹同時悉無後尾也 安帝隆安四年十月梁州有馬生角刺史郭銓送示桓元按劉向說曰馬不當生角猶元不當舉兵向上也元不悟以至夷滅

石季龍在鄴有一馬尾有燒狀入其中陽門出顯陽門東宮皆不得入走向東北俄爾不見術者佛圖澄歎曰災其及矣逾年季龍死其國遂滅

慕容廆有駿馬曰赭白有奇相逸力石虎之伐棘城也孰將出避難欲乘之馬悲鳴踉齧人莫能近孰曰

此馬見異先朝孤常仗之濟難今不欲者蓋先君之意乎乃止虎尋退甃益竒之至是四十九歲而駿逸不虧雋比之鮑氏驄命鑄銅以圖其象親爲銘贊鐫其旁置之薊城東掖門是歲象成而馬死

梁末侯景僭號江南每將戰所乘白馬長鳴蹠足者輒勝垂頭者輒不利西川之役馬卧不起景拜請箠之竟不動近馬禍也景因此敗

陳宣帝大建五年衡州馬生角五行傳以爲兵象敗亡之表吳明徹師敗爲周師所虜

北齊文宣天保中廣宗有馬兩耳間生角如羊尾京房易傳曰天子親伐則馬庄角四年契丹犯塞文宣親御六軍擊之

隋煬帝大業四年太原廐馬死者大半帝怒遣使按問主者曰每夜廐中馬無故自驚因而致死帝令巫者視之巫者知帝將有遼東之役因希旨言曰先帝令楊素史萬歲取之將鬼兵以伐遼東也帝大悅因釋主者洪範五行傳曰逆天氣故馬多死是時帝每歲巡幸北事長城西通且末國內虛耗天戒若曰除廐馬無事巡幸帝不悟遂至亂 十一年河南扶風三郡並有馬生角長數寸與天保初同占是時帝頻歲親征高麗 恭帝

義寧元年帝在江都宮龍廐馬無故而死旬日死至數百匹與大業四年同占 二年五月戊申有馬生角長二寸末有肉角兵象

唐高祖武德二年十月王世充僞左僕射韋霽馬生角當項 高宗永隆二年監牧馬大死十八萬匹馬者國之武備天去其備國將危亡 武后文明初新豐有馬生駒二首同項各有口鼻生而死又咸陽牝馬生石大如升上微有綠毛皆馬禍也 元宗開元十二年五月太原獻異馬駒兩肋各十六肉尾無毛 二十五年濮州有馬生駒肉角 二十九年三月滑州刺史李邕獻

馬肉鬣鱗臆嘶不類馬日行三百里 德宗建中四年五月滑州馬生角 文宗太和九年八月易定馬飲水因吐一珠以獻 開成元年六月揚州民明齊家馬生角長一寸三分 武宗會昌元年四月桂州有馬生駒三足能隨羣於牧 懿宗咸通三年郴州馬生角 十一年沁州綿上及和川牡馬生子皆死京房易傳曰方伯分威厥妖牡馬生子 僖宗乾符二年河北馬生人中和元年九月長安馬生人 二年二月蘇州嘉興馬生角 光啓二年夏四月僖宗在鳳翔馬尾皆咤蓬如篲咤怒象 文德元年李克用獻馬二肘膝皆有鬣

長五寸許蹄大如七寸甌

宋太宗太平興國三年靈州獻官馬駒足各有二距

雍熙二年虔州吏李祚家馬生駒足各有二距 四年

鄜州直羅縣民高英家生馬前兩足如牛 端拱二年

夏州民程真家馬生二駒 真宗大中祥符九年十二

月大名監馬生駒赤色肉尾無鬃 徽宗宣和五年馬

生兩角長三寸四足皆出距時北方正用兵 高宗紹

興八年廣州西海壩有海獸如馬蹄鬣皆丹夜入民舍

聚衆殺之明日海溢環村百餘家皆溺死近馬禍也

五年廣西市馬全綱疫死 孝宗淳熙六年十二月岩

昌西馬金州馬皆大疫 十二年黎雅州獻馬有角長

二寸京房易傳曰臣易上政不順厥妖馬角茲謂賢士

不足 光宗紹熙元年二月丙申右丞相乘馬早朝入

禁扉馬斃近馬禍也 寧宗嘉定五年正月右丞相入

賀於東宮馬驚墮地衣幘皆敗相額微損事與上同

牛禍

春秋宣公三年郊牛之口傷改卜牛牛死劉向以爲近

牛禍也時宣公與公子遂謀殺子赤而自立又以喪娶

區霽昏亂亂成於口天猶惡之生則不饗其祀 謂郊牛

死則災燔其廟 成三年新宮災新宮宣董仲舒指略同

秦孝文王五年旃胸衍胸衍地名有獻五足牛劉向以為近牛禍也先是文惠王初都咸陽廣大宮室南臨渭北臨涇思心失逆土氣足者止也戒秦建止奢秦將致危亡秦不改至於離宮三百復起阿房京房易傳曰興繇役奪民時厥妖牛生五足

漢景帝中六年梁孝王田北山有獻牛足生背上劉向以為近牛禍先是孝王驕奢起苑方三百里宮館閣道相連三十餘里納邪臣羊勝之計欲求為漢嗣刺殺議臣爰盎事發免誅猶有恨心內則思慮霧亂外則土功過制故牛禍作足出於背下姦上之象也猶不能解發

疾暴死又凶短之咎也

後漢明帝永平十八年牛疫死 章帝建初四年冬京都牛大疫時竇皇后以宋貴人子為太子寵幸令人伺求貴人過隙以讒毀之帝不知太后不善厥咎霧也

晉武帝太康元年幽州塞北有死牛頭語近牛禍也是時帝多疾病深以後事為念而托付不以至公思瞽亂之應也按師曠曰怨讎動於人則有非言之物而言又其義也京房易傳曰殺無罪牛生妖 惠帝泰安中江夏張騁所乘牛言曰天下亂乘我何之騁懼而還犬又言曰歸何早也尋後牛又人立而行騁使善卜者卦之

謂曰天下將有兵亂爲禍非止一家其年張昌反先略江夏騁爲將帥於是五州殘亂騁亦族滅京房易傳曰牛能言如其言占爲凶易萌氣樞曰人君不好士走馬被文繡犬狼食人食則有六畜言時天子諸侯不以惠下爲務又其應也 元帝建武元年七月晉陵陳門才牛生犢一體兩頭京房易傳曰牛生子二首一身天下將分之象也是時愍帝蒙塵於平陽尋爲逆胡所殺元帝卽位江東天下分爲二是其應也 太興元年武昌太守王諒牛生子兩頭八足兩尾共一腹三年後死又有牛一足三尾皆生而死按司馬彪說兩頭者政在私

門上下無別之象也京房易傳曰足多者所任邪也足少者不勝任也其後王敦等亂政此其祥也 四年十

二月郊牛死按劉向說春秋郊牛死曰宣公區霭昏亂故天不饗其祀今元帝中興之業實王導之謀也劉隗探會上意以得親幸導見疏此區霭不睿之禍 成帝

咸和二年五月護軍牛生犢兩頭六足是冬蘇峻作亂

七年九德人袁榮家產犢兩頭八足二尾共身桓元

之國在荊州詣刺史殷仲堪行至鶴穴逢一老公驅青

牛形色瓌異桓元卽以所乘牛易取乘至零陵涇溪駿

駛所吏反非常息駕飲牛牛逕入江水不出元遣人覘守

經曰無所見於後元敗被誅

梁武陵王紀祭城隍神將烹牛忽有赤蛇繞牛口牛禍也象類言之又爲龍蛇之孽魯宣公三年牛之口傷時以爲天不享棄宣公也五行傳曰逆君道傷故有龍蛇之孽時紀雖以赴援爲名而實妄自尊亢思心之咎神不享君道傷之應果爲元帝所敗

陳宣帝太建三年監豫州陳桃根獻青牛

後魏孝文承明元年牛疫死傷大半

北齊後主武平二年并州獻五足牛牛禍也洪範五行傳曰牛土應宮室之象也帝尋大發卒於仙都苑鑿池

築山樓殿間起窮華極麗功始就而國亡

後周武帝建德六年陽武有獸三狀如水牛一黃一赤一黑赤與黑者鬪久之黃者自傍觸之黑者死黃赤俱入河近牛禍也黑周所尚色死者滅亡之象後數載隋代周旗牲尚赤戎服以黃

隋文帝大業初恒山有牛四脚膝上各生一蹄其後建東都築長城開溝洫

唐高宗調露元年春牛大疫京房易傳曰牛少者穀不成又占曰金革動 武后長安中有獻牛無前膊三足而行者又有牛膊上生數足蹄甲皆具 武太后從姊

之子司農卿宗晉卿家牛生三角 中宗神龍元年春
牛疫 二年冬牛疫 先天初洛陽市有牛左脇有人
手長一尺或牽之以乞丐 元宗開元十五年河北牛
大疫 代宗大歷八年武功櫟陽民家牛生犢二首
德宗貞元二年牛疫 四年郊牛生犢六足足多者下
不一 七年關輔牛大疫 懿宗咸通七年荊州民家
牛生犢五足 十五年夏渝江陽有水牛生驢駒駒死
僖宗光啓元年河東有牛人言其家殺而食之 二
年延州膚施有死牛復生

宋太祖乾德三年至真宗天禧五年州縣上言民間牛

生二犢三犢者凡一百二十二 太宗太平興國九年
七月知乾州衛昇獻三角牛 仁宗天聖迄英宗治平
牛生二犢者三十二三犢者一 神宗熙寧三年距元
豐八年郡國言民家牛生二犢者三十五生三角者一
哲宗元祐元年距元符三年郡國言民家牛生二犢
者十有五 徽宗大觀元年閬州達州俱言牛生二犢
政和五年七月安武軍言信都縣民范濟家牛生麒
麟 重和元年三月陝州言牛生麒麟 宣和二年十
月尚書省言歙州歙縣民鮑珙家牛生麒麟 三年五
月汝州梁縣民邢喜家牛生麒麟 高宗紹興元年紹

與府有牛戴刃突入城市觸馬裂腹出腸時衛卒多犯
禁屠牛者牛受刃而逸近牛禍也 十六年靜江府城
北二十里有奔犢觸人於壁腸胃流地牛狂走兩日不
可執卒以射死牛禍也 十八年五月邛州依政縣牛
生二犢 二十一年七月遂寧府牛生二犢三 二十
五年八月漢州牛生二犢 孝宗淳熙十二年臨安府
仁和縣良渚有牛二首四足七日而死餘杭縣有犢二
首一身 光宗紹熙十四年春淮西牛大疫死 寧宗
慶元元年淮浙牛多疫死 三年饒州樂平縣田家牛
生犢如馬一角麟身四尾農民以不祥殺之或惜其爲

麟同縣萬山牛生犢人首

文獻通考卷第三百十一

文獻通考卷第三百十二

鄱 陽 馬 端 臨 貴 與 著

物異考十八

豕禍

左傳齊襄公田于貝邱見豕從者曰公子彭生也公怒射之豕人立而啼公懼墮車傷足喪屨劉向以為近豕禍也未幾公為公孫無知所弑

漢昭帝元鳳元年燕王宮永巷中豕出困壞都竈師古曰

者養豕之牢也都竈丞銜其脯六七枚置殿前舖古劉

向以為近豕禍也時燕王旦與長公主左將軍謀為大

逆暴急無道竈者生養之本豕而敗竈陳黼於庭黼竈將不用宮室將廢辱也燕王不改卒伏其辜京房易傳曰衆心不安君政厥妖豕入居室

吳孫皓時野豕入右司馬丁奉營此豕禍也後奉見遣攻穀陽無功而反皓怒斬其導軍及舉大衆北出奉及萬彀等相謂曰若至華里不得不各還也此謀泄奉時已死皓殺其子温家屬皆遠徙豕禍之應也龔遂曰山野之獸來入宮室宮室將空又其應也

晉懷帝永嘉中壽春城中有豕生兩頭而不活周馥取而觀之時識者云豕北方畜胡狄象兩頭者無上也生

而死不遂也天戒若曰勿生專利之謀將自致傾敗也

周馥不悟遂欲迎天子令諸侯俄爲元帝所敗是其應

石勒亦尋渡淮百姓死者十有其九 元帝建武元年

有豕八足此聽不聰之罰又所任邪也是後有劉隗之

變 成帝咸和六年六月錢塘人家豕音加牡豕也豕產兩

子而皆人面如胡人狀其身猶豕京房易傳曰豕生人

頭豕身者危且亂今此豕而產異之甚也 孝武帝

太元四年四月京都有豚徒渾反一頭二脊八足 十三

年京都人家豕產子一頭二身八足並與建武同妖也

是後宰相沉酗香弓反不恤朝政近習用事漸亂國綱至

於大壞也

劉聰末年犬與豕交於相國府門又交於宮門又交司隸御史門有豕著進賢冠升聰座犬冠武冠帶綬與豕並升俄而鬪死殿上宿衛莫有見其入者 劉曜時武功豕生犬

隋文帝開皇末渭南有沙門三人行投陁法於人場圃之上夜見大豕來詣其所小豕從者十餘謂沙門曰阿練我欲得賢聖道然猶負他一命言罷而去賢聖道者君上之所行也皇太子勇當嗣業行君上之道而被囚廢之象也一命者言爲煬帝所殺 渭南有人寄宿他

舍夜中聞二豕對語其一曰歲將盡阿耶明日殺我供歲何處避之一答曰可向水北姊家因相隨而去天將曉主人見豕不得意是宿客而詰之宿客言狀主人如其言而得豕其後蜀王秀得罪帝將殺之平樂公主每匡救得全後數年而帝崩歲盡之應

唐太宗貞觀十七年六月司農寺豕生子一首八足自頸分爲二 德宗貞元四年二月京師民家有豕生子兩首四足首多者上不一也是歲宣州大雨震電有物墮地如豬手足各兩指執赤班蛇食之頃之雲合不復見近豕禍也 憲宗元和八年四月長安西市有豕生

子三耳八足自尾分爲二足多者下不一也 懿宗咸通七年徐州蕭縣民家豕出鬪舞又牡豕多將隣里羣豕而行復自相噬齧 僖宗乾符六年越州山陰民家有豕入室內壞器用銜案乍置水次 廣明元年絳州稷山縣民家豕生如人狀無眉目耳髮占爲邑有亂 宋太祖乾道六年南雄州民家豕生數豚而首各備他獸形亦有人首者占爲邑有亂 光宗紹熙二年三月辰州叙浦縣常平倉敖墻壁爲羣豕所穴食倉米五十石彘食人食近豕禍也 寧宗慶元初饒州樂平縣民家豕生豚與南雄豕禍同占而更具他獸蹄京房妖占食皆豕禍也

羊禍

史記魯定公時季桓子穿井得土缶中得蟲若羊缶益之屬 卽今近羊禍也羊者地上之物出於土中象定公不用孔子之言而聽季氏暗昧不明之應一曰羊去野外而拘土缶者象魯公失其所而拘於季氏亦將拘於家臣也是歲陽虎囚季桓子後二年虎劫公伐孟氏兵敗竊寶玉大弓出亡

晉成帝咸和二年五月司徒王導廐羊生無後足此羊禍也京房易傳曰足少者下不勝任也明年蘇峻破京都導與帝俱幽石頭是其應也

隋文帝開皇十二年六月繁昌楊悅見雲中二物如羝羊黃色大如新生犬鬪而墜悅獲其一數旬失所在近羊禍也洪範五行傳曰君不明逆火政之所致也狀如新生犬者羔類也雲體掩蔽邪佞之象羊國姓羔羊子也皇太子勇既升儲貳晉王陰毀之而被廢黜二羔鬪一羔墜之應也 恭帝義寧二年麟遊太守司馬武獻羊羔生而無尾時議者以爲楊氏子孫無後之象是歲

煬帝被弑恭帝遜位又太原獻羝羊無頭而不死

唐元宗開元二年正月原州獻肉角羊 二年三月富平縣有肉角羊 武宗會昌二年春代州崞縣羊生二首連頸兩尾占曰二首上不一也 懿宗咸通三年夏定陶民家羊生羔如犢 僖宗乾符二年洛陽建春門外因暴雨有物墮地如羝羊不食頃之入地中其跡月餘不滅或以爲雨土也占曰當旱

漢劉鋹苑中羊吐珠

宋高宗紹興五年江東西羊大疫班固以爲暑歲羊多疫死及爲怪 十七年汀州羊生無角 寧宗嘉定九

年信州玉山縣羊生駢角

犬異

春秋左氏傳襄公十七年十一月甲午宋國人逐獬狗

獬狂也 征例反 獬狗入于華臣氏華元子 國人從之臣懼遂奔陳

先是臣兄閔為宋卿閔卒臣使賊殺閔家宰遂就其妻

宋平公聞之曰臣不唯其宗室是暴大亂宋國之政遂

逐之左師向戌曰大臣不順國之恥也不如蓋之謂掩覆其

也事公乃止華臣亢暴失義內不自安故犬禍至以犇亡

也

威烈王二十七年乙亥五月晉有三大犬率眾犬數萬

聚于絳殺一犬于東方一犬于西方

漢高后八年三月祓霸上師古曰祓者除惡之祭也音廢還過枳道見

物如倉狗擗高后掖師古曰擗謂拘持之也音廢忽而不見

卜之趙王如意為祟遂病掖傷而崩先是高后鳩殺如

意支斷其母戚夫人手足摧其眼以為人彘師古曰摧謂敲擊去

其精也摧音口角反凡文帝後五年六月齊雍城門

外有狗生角師古曰雍城門者齊門名也春秋左氏傳

先是帝兄齊悼惠王亡後帝分齊地立其庶子七人皆

為王師古曰謂齊孝王將閭濟北王志菑川王賢膠東

王雄渠膠西王卬濟南王辟光并城陽恭王喜是兄弟並疆有炕陽心故犬禍見也犬守御角兵象

乾隆十二年校刊

物異十八

在前而上鄉者也師古曰鄉讀曰嚮此下亦同犬不當生角猶諸侯

不當舉兵鄉京師也天之戒人蚤矣師古曰蚤古早字諸侯不

悟後六年吳楚叛濟南膠西膠東三國應之舉兵至齊

齊王猶與城守與讀曰豫三國圍之會漢破吳楚因誅四王

故天狗下梁而吳楚攻梁狗生角於齊而三國圍齊漢

卒破吳楚於梁誅四王於齊京房易傳曰執政失下將

害之厥妖狗生角君子苟免小人陷之厥妖狗生角

景帝三年二月邯鄲狗與彘交悖亂之氣犬豕之禍也

師古曰悖惑也音布內反此下亦同是時趙王遂悖亂與吳楚謀為逆遣

使匈奴求助兵卒伏其辜犬兵革失衆之占如淳曰犬吠守似兵

革外附他類失衆也豕北方匈奴之象逆言失聽交於異類以生

害也京房易傳曰夫婦不嚴厥妖狗與豕交茲謂反德

國有兵革昌邑王有狗冠方山冠事詳見服妖門成帝

河平元年長安男子石良劉音相與同居師古曰二人共止一室

有如人狀在於室中擊之為狗走出去後有數人被甲

持兵弩至良家良等格擊或死或傷皆狗也自二月至

六月乃止鴻嘉中狗與彘交

魏公孫淵家有犬冠幘絳衣上屋此犬禍也屋上亢陽

高危之地天戒若曰亢陽無上偷自尊高狗而冠者也

及淵自立為燕王果為魏所滅京房易傳曰君不正臣

乾隆十二年校刊

欲篡厥妖狗出朝門 魏侍中應璩在直廬歎見一白
狗出門問衆人無見者踰年卒近犬禍也

吳諸葛恪征淮南歸將朝會犬銜引其衣恪曰犬不欲
我行乎還坐有頃復起犬又銜衣乃令逐犬遂升車入
而被害

晉武帝太康九年幽州有犬鼻行地三百餘步天戒若
曰是時帝不思和嶠之言卒立惠帝以致衰亂是言不
從之罰也 惠帝元康中吳郡婁縣人家聞地中有犬
子聲掘之得雌雄各一還置窟中覆以磨石經宿失所
在天戒若曰帝旣衰弱藩王相譖故有犬禍 永興元

年丹陽內史朱逵家犬生三子皆無頭後逵爲揚州刺
史曹武所殺 孝懷帝永嘉五年吳郡嘉興張林家狗
人言云天下人餓死有二胡之亂天下饑荒焉 愍帝

建興狗與豬交按漢書景帝時有此以爲悖亂之氣亦
犬豕禍也犬兵革之占也豕北方匈奴之象逆言失聽
異類相交必生害也俄而帝沒於胡是其應也 元帝

太興中吳郡太守張懋聞齋內牀下犬聲求而不得旣
而地自坼見有二犬子取而養之皆死尋而懋爲沈克
所害京房易傳曰讒臣在側則犬生妖 太興四年廬
江灊縣何旭家忽聞地中有犬子聲掘之得一母犬青

釐音黎黑而黃色色狀甚羸瘦走入草中不知所在視其處有

二犬子一雄一雌哺而養之雌死雄活及長爲犬善噬

野獸其後旭里中爲蠻所沒安帝隆安初吳郡治下

狗恒夜吠聚高橋上人家狗有限而吠聲甚衆或有夜

覘勅艷反視之云一狗假有兩三頭皆前向亂吠無幾孫

恩亂於吳會焉是時輔國將軍孫無終家於旣陽地中

聞犬子聲尋而地坼有二犬子皆白色一雄一雌取而

養之皆死後無終爲桓元所誅滅按尸子曰地中有犬

名曰地狼夏鼎志曰掘地得犬名曰賈此蓋自然之物

不應出而出爲犬禍也

桓元將拜楚王已設拜席羣官陪位元未及出有狗

來便其席莫不驚怪元性猜暴竟無言者逐狗改席

而已天戒若曰桓元無德而叨竊大位故犬便其席

示其安據之甚也八十日元敗亡焉

劉聰末年犬與豕交詳見豕禍門

北齊文宣天保四年鄴中及頓邱並有犬與女交洪範

五行傳曰異類不當交而交諄亂之氣犬交人爲犬禍

犬禍者亢陽失衆之應也時帝不恤國政恩澤不流於

其國後主時犬爲開封儀同雌者有夫人郡君之號

給兵以奉養食以梁肉藉以茵蓐天奪其心爵加於犬

近犬禍也天意若曰卿士皆類犬後主不悟遂以取滅
後周武帝保定三年有犬生子腰已後分爲兩身二尾
六足犬猛畜而有爪牙將士之象也時宇文護與侯伏
侯龍恩等有謀懷貳犬體後分此其應也

隋煬帝大業元年鴈門百姓間犬多去其主羣聚於野
形頓變如狼而噉噬行人數年而止五行傳曰犬守禦
者也而今去其主臣下不附之象形變如狼狼色白爲
主兵之應也其後帝窮兵黷武勞役不息天戒若曰無
爲勞役守禦之臣將叛而爲害帝不悟遂起長城之役
續有西域遼東之舉天下怨叛及江都之變並宿衛之

臣也

唐高祖武德三年突厥處羅可汗將入寇夜聞犬羣嗥
而不見犬 武后初酷吏邱神勣家狗生子無首當項
有孔如口晝夜鳴吠俄失所在 神功元年安國獻兩
首犬首多者上不一也 元宗天寶十一載李林甫晨
起盥飾將朝取書囊視之中有物如鼠躍於地卽變爲
狗大雄目張牙視林甫林甫射之中霰然有聲隨箭沒
武宗貞元七年趙州栢鄉民李崇真家黃犬乳犢

憲宗會昌三年定州深澤令家狗生角 宣宗大中初
狗生角京房曰執政失將害之應又曰君子危陷則狗

生角 懿宗咸通中會稽有狗生而不能吠擊之無聲
狗職吠以守禦其不能者衆鎮守者不能禦寇之兆
成汭爲荆南節度使城中犬皆夜吠日者向隱以爲城
郭將邱墟 僖宗中和二年秋丹徒狗與彘交占曰諸
侯有謀害國者

宋高宗紹興六年四月中京大雪雷震羣犬數十爭赴
土河而死可救者纔二三戎狄犬類也戎狄亂華將自
斃也 寧宗慶元二年撫州有犬人坐於郡守治事之
上後守臣林廷彥卒於官

下體生上之病

西漢景帝時梁孝王北獵梁山有獻牛足出背上王惡
之六月中病熱六日薨

張晏曰足當處下所以輔身也
象孝王行朝而于上也北者陰
也又在梁山明爲梁也牛者丑之畜衝
在六月北方數六故六月六日王薨也

北周武帝保定三年有牛足生於背

唐懿宗咸通十四年七月宋州襄邑有獵者得雉五足
三足出背上足出於背下干上之象五足者衆也

羽蟲之異

契母曰簡狄有娥氏之女爲帝嚳次妃三人行浴見元
鳥墜其卵簡狄取吞之因孕生契

姜嫄爲帝嚳元妃履巨人跡而生稷以爲不祥棄之置

渠中冰上飛鳥以其翼覆薦之姜嫄以爲神乃收養之
高宗祭成湯有蜚雉登鼎耳而雒劉歆以爲羽蟲之孽
鼎宗廟之器野鳥自外來入爲宗廟器主是繼嗣將易
也一曰鼎三公象以耳行野鳥居鼎耳小人將居公位
敗宗廟之祀武丁恐駭謀於忠賢修德而正事故能攘
其妖致百年之壽

周武王伐紂師渡孟津旣濟有火自上復於下至於王
屋流爲烏其色赤其聲魄云馬融曰王屋王所居屋流
行也魄然安定意也鄭元
曰書說云烏有孝名武王卒父大業故烏瑞臻赤者周
之正色也索隱曰按今文泰誓流爲鷦鷯擊鳥也馬融
云明武王
能伐紂

春秋昭公二十五年夏有鸛鶴來巢劉歆以爲羽蟲之
孽其色黑又黑祥也視不明聽不聰之罰也劉向以爲
蜚有蜚不言來者氣所生所謂眚也師古曰此蜚謂負
蝥也其爲蟲臭盛

短狐卽今所謂水弩也隱元年有蜚莊十八
年有蜚蜚音翡盛音蝮蜚亦作蜚其音同耳鸛鶴言來
者氣所致所謂祥也鸛鶴夷狄穴藏之禽來至中國不

穴而巢陰居陽位師古曰今之鸛鶴中國皆有依周官
而言但不踰濟水耳左氏以爲魯所

常無異而書之而此云夷狄禽來未喻其意又此鳥本
亦巢居不皆穴處也書巢者著其居止字乳不卽去也
象季氏將逐昭公去宮室而居外野也鸛鶴白羽旱之
祥穴居而好水黑色爲主急之應也天戒若曰旣失衆
不可急暴急暴陰將持節陽以逐爾去宮室而居外野

矣昭不悟而舉兵圍季氏爲季氏所敗出犇於齊遂死於外野董仲舒指畧同

赧王二十九年宋有雀生鱗于城之陬史占之曰占小而生大必霸天下宋康王喜起兵滅滕伐薛東敗齊南敗楚西敗魏與齊魏爲敵欲霸之亟成射天笞地斬社稷而焚滅之又爲長夜之飲天下之人謂之桀宋齊湣王起兵伐之民散城不守宋王奔魏死于溫

漢景帝三年十一月有白頸烏與黑烏羣鬪楚國呂縣白頸不勝墮泗水中死者數千劉向以爲近白黑祥時楚王戊暴逆無道與吳王謀反烏羣鬪者師戰之象白

頸者小明小者敗也墮於水將死水地其後王戊反兵敗走爲人所殺京房易傳曰逆親親厥妖白黑烏鬪於

國 武帝太始三年二月行幸東海獲赤鴈作朱鴈之

歌 昭帝始元元年春二月黃鵠下建章宮太液池中

臣瓚曰時漢用土德服色尚黃鵠色皆白而今更黃以爲土德之瑞故紀之也師古曰非也黃鵠大鳥一舉千里者非白鵠也 元鳳元年有烏與鵲鬪燕王宮池上烏墮池

死近黑祥也時燕王旦謀爲亂遂不改悟伏辜而死楚燕皆骨肉藩臣以驕怨而謀逆俱有烏鵲鬪死之祥行同而占合此天人之明表也燕一烏鵲鬪於宮中而黑者死楚以萬數鬪於野外而白者死象燕陰謀未發獨

王自殺於宮故一鳥水色者死楚亢陽舉兵軍師大敗

於野故衆鳥金色者死天道精微之效也京房易傳曰

專征劫殺厥妖鳥鵲鬪 昭帝時有鵲鵲或曰禿鶯師古

曰鵲鵲即汗澤也一名淘河腹下胡大如數升囊好羣入澤中杼水食魚因名禿鶯亦水鳥也鵲音大奚反鵲

音胡鶯音秋集昌邑王殿下王使人射殺之劉向以為水鳥

青色青祥也時王馳騁無度慢侮大臣不敬至尊有服

妖之象師古曰謂多治妖注冠又以冠奴也故青祥見也野鳥入處宮室

將空王不悟卒以亡京房易傳曰辟退有德厥咎狂厥

妖水鳥集於中國 宣帝元康三年春以神雀數集泰

山賜諸侯王丞相以下令郎從官帛吏民爵女子牛酒

鰥寡孤獨高年帛六月詔曰前年夏神爵集雍晉灼曰漢注大

如鸚爵黃喉白頸黑背腹斑文也今五色鳥以萬數飛過屬縣三輔諸縣也

翱翔而飛欲集未下其令三輔毋得以春夏擿巢探卵

彈射飛鳥具為令 四年三月神爵五采以萬數集長

樂未央北宮高寢甘泉泰時殿中及上林苑 京兆尹

張敞舍鵲雀飛集丞相府丞相黃霸以為神雀議欲以

聞敞奏霸曰長吏守丞對時臣敞舍有鵲雀飛止丞相

府屋上丞相以下見者數百人邊臣多知鵲雀者問之

皆陽不知丞相圖議上奏圖謀也曰臣聞上計長吏守丞

以興化條皇天報下神雀後知從臣敞舍來乃止郡國

吏竊笑丞相仁厚有知畧微信奇怪也

東坡致堂論見鳳凰門

成帝河平元年二月庚子泰山山桑谷有戴

音鴟也

焚其

巢男子孫通等聞山中羣鳥戴鵲聲往視見其巢難

然古

字盡墮地中有三戴殼燒死

鳥子新生而哺者曰戴

樹大四圍巢

云地五丈五尺太守以聞戴色黑近黑祥貪虐之類也

易曰鳥焚其巢旅人先笑後號咷泰山岱宗五嶽之長

王者易姓告代之處也天戒若曰勿近貪虐之人聽其

賊謀將生焚巢自害其子絕世易姓之禍其後趙飛燕

得幸立為皇后姊妹專寵後宮有子者殺之并殺其母

帝崩后坐誅此焚巢殺子後號咷之應也一曰土莽貪

虐而任社稷之重卒成易姓之禍云京房易傳曰人主

暴虐鳥焚其舍

鴻嘉二年三月博士行大射禮有飛

雉集於庭歷階登堂而雉後雉又集太常宗正丞相御

史大夫大司馬車騎將軍之府又集未央承明殿屋上

時大司馬車騎將軍王音待詔寵等上言天地之氣以

類相應

師古曰以經術待詔其人名寵不記姓流俗書本寵上輒加孫字非也

譴告人君

甚微而著雉者聽察先聞雷聲故月令以紀氣

師古曰謂季冬

之月云雉

經載高宗雉雉之異

師古曰已解於上

以明轉禍為

福之驗今雉以博士行禮之日大眾聚會飛集於庭歷

階登堂萬眾睢睢

師古曰睢睢仰目視貌也音呼推反

驚怪連日徑歷三

公之府太常宗正典宗廟骨肉之官然後入宮其宿留告曉人具備深切師古曰宿音先就反留音力救反雖人道相戒何以過是宜謀於賢知克已復禮以求天意繼嗣災變可銷也 綏和二年三月天水平襄有燕生爵哺食至大俱飛京房易傳曰賊臣在國厥咎燕生爵諸侯銷一日生非其類子不嗣世

後漢明帝永平十一年獲白雉 十七年神雀五色翔集京師 章帝元和二年幸泰山柴告岱宗有黃鵠三十西南來經祠壇上東北過宮屋翱翔升降 桓帝永壽元年白鳥見齊國 靈帝中平三年八月懷陵上有

萬餘爵先極悲鳴已亂鬪相殺皆斷頭懸著樹枝枳棘到六年靈帝崩大將軍何進以內寵外嬖積惡日久欲悉糾黜以隆更始冗政而太后持疑事久不決進從中出於省內見殺因是有司盪滌虔劉後祿而尊厚者無餘矣夫陵者高大之象也天戒若曰諸懷爵祿而尊厚者還自相害至滅亡也古今註曰建武九年六郡八縣鼠食稼張璠紀曰初平元年三月

月獻帝初入未央宮翟雉飛入未央宮獲之獻帝春秋曰建安七年五色大鳥集魏郡衆鳥數千隨之魏志曰二十三年禿鶯集鄴宮文昌殿後池 獻帝建安二十三年禿鶯鳥集鄴

宮文昌殿後池明年魏武王薨

蜀後主建興九年十月江陽至江州有鳥從江南飛渡

江北不能達墮水死者以千數時諸葛亮連年動衆志
吞中夏而終死渭南所圖不遂又諸將分爭頗喪徒旅
鳥北飛不能達墮水死者皆有其象也亮竟不能過渭
是其應也

魏文帝黃初元年四月饒安縣言白雉見未央宮中又
有燕生鷹口爪俱赤此與商紂宋隱同象 三年又集

雒陽芳林園池 四年五月有鷓鴣題胡二音鳥集靈芝池

按劉向說此羽蟲之孽又青祥也詔曰此詩人所謂汗

澤者也曹詩刺共音恭公遠君子近小人今豈有賢智之

士處於下位否則斯鳥胡爲而至哉其博舉天下雋德

茂才獨行君子以答曹人之刺於是楊彪管寧之徒咸

見薦舉此所謂覩妖知懼者也雖然猶不能優容亮直

而多溺偏私矣京房易傳曰辟退有德厥妖水鳥集於

國井 七年燕又集雒陽芳林園池與三年同其夏文

帝崩 明帝景初元年陵霄闕始構有鵲巢其上鵲體

白黑雜色此羽蟲之孽又白黑祥也帝以問高堂隆對

曰詩云維鵲有巢維鳩居之今興起宮室而鵲來巢此

宮室未成身不得居之象也天戒若曰宮室未成將以

他姓制御之不可不深慮也於是帝改容動色 又有

燕生巨鰈苦侯反於衛國李蓋家形若鷹吻似燕此羽蟲

之孽又赤眚也高堂隆曰此魏室之大異防鷹揚之臣於蕭牆之內其後宣帝起誅曹爽遂有魏室 景初末又集芳林園池已前再至輒有大喪帝惡之其年明帝崩

吳孫權赤烏元年以有赤烏之祥改元 十一年八月白鳩見於章安 十二年四月有兩烏銜鵲墮東館權使領丞相朱據燎鵲以祭按劉歆說此羽蟲之孽又黑祥也視不明聽不聰之罰也是時權意溢德衰信讒好殺二子將危將相俱殆覩妖不悟加之以燎昧道之甚者也明年太子和廢魯王霸賜死朱據左遷陸議憂卒

是其應也東館典教之府鵲墮東館又天意乎 太元

二年正月封前太子和爲南陽王遣之長沙有鵲巢其

帆檣

凡檣二音

和故官僚聞之皆憂慘以爲檣木傾危非久

安之象是後果不得其死 孫亮建興二年十一月有

大鳥五見於春申吳人以爲鳳凰明年改元爲五鳳漢桓帝時有五色大鳥司馬彪云政道衰缺無以致鳳乃羽蟲孽耳孫亮未有德政孫峻驕暴方甚此與桓帝同事也按瑞應圖大鳥似鳳而爲孽者非一宜皆是也 孫休永安三年西陵言赤鳥見 六年白燕見於慈湖赤雀見於豫章

晉武帝泰始四年八月有翟雉飛上閭闔門天戒若曰
閭闔門非雉所止猶殷宗雉登鼎耳之戒也 惠帝永
康元年趙王倫謀篡京師得異鳥莫能名倫使人持出
周旋城邑市以問人積日宮西有小兒見之遂自言曰
服留鳥翳持者卽還白倫倫使更求又見之仍將入宮
密籠鳥并閉小兒戶中明日視之悉不見此蟲之孽時
趙王倫有目瘤之疾言服留者謂倫留將服其罪也尋
而倫誅 趙王倫篡位鶉入太極殿雉集東堂天戒若
曰太極東堂皆朝享聽政之所而鶉雉同日集之者趙
王倫不當居此位也詩云鶉之彊彊鶉之奔奔人之無

良我以爲君其此之謂乎尋而倫滅 孝懷帝永嘉元
年二月洛陽東北步廣里地陷有蒼白二色鶩出蒼者
飛翔冲天白者止焉此羽蟲之孽又黑白祥也董養曰
步廣周之狄泉盟會地也白者金色國之行也蒼爲胡
象其可盡言乎是後劉元海石勒相繼亂華 明帝太
寧三年八月庚戌有大鳥二蒼黑色翼廣一丈四尺其
一集司徒府射而殺之其一集市北家人舍亦獲焉此
羽蟲之孽也又黑祥也及閏月戊子而帝崩後遂有蘇
峻祖約之亂 成帝咸和二年正月有五鷗鳥集殿庭
北又白祥也是時庾亮苟違衆謀將召蘇峻有言不從

之咎故白祥先見也三年二月峻果作亂宮殿焚毀化為汙萊鳥來二音此其應也 咸康八年七月有白鷺集殿

屋是時康帝始即位不永之祥也後涉再替而帝崩按劉向日野鳥入處宮室將空此其應也 海西初以興

寧三年二月即位有野雉集於相風此羽蟲之孽也尋為桓温所廢也 孝武帝太元十六年六月鵲巢太極

東頭鴟尾又巢國子學堂西頭十八年東宮始成十九年正月鵲又巢其西門此殆與魏景初同占學堂風教之所聚西頭又金行之祥及帝崩後安皇嗣位桓元遂篡風教乃頽金行不競之象也 安帝雍熙三年龍驤

將軍朱猗

於離反

戍壽陽婢炊飯忽有羣鳥集竈競來啄

噉婢驅逐不去有獵狗咋殺兩鳥餘鳥因共啄殺狗又噉其肉唯餘骨存此亦羽蟲之孽又黑祥也明年六月猗死此其應也

石虎饗羣臣於太武殿前有白鴈百餘集於馬道南命射之無所獲太史令趙攬以為白鴈集庭宮室將空 揚州送黃鵠雛五頸長一丈聲聞十餘里泛之於元武池

宋孝武帝大明七年十一月大閱水師於中江有白雀二集華蓋

梁武帝中大同元年邵陵王綸在南徐州坐廳事有野鳥如戴數百飛屋梁上彈射不中俄頃失所在京房易飛候曰野鳥入君室其邑虛君亡之他方後綸爲湘東王所襲竟致奔亡爲西魏所殺

侯景在梁將受錫命陳備物於庭有野鳥如山雀赤觜集於冊書之上鶴鷓鳴於殿與中大同元年同占景尋敗將亡入海中爲羊鷓所殺

陳後主時蔣山有衆鳥鼓翼而鳴曰奈何帝京房易飛候曰鳥鳴門闕如人音邑且亡蔣山吳之望也鳥於上鳴吳邑空虛之象及陳亡建康爲墟又陳未亡時有一

足鳥集於殿庭以觜畫地成文曰獨足上高臺盛草變灰獨足者叔寶獨行無衆之應盛草成灰者陳政蕪穢被隋火德所焚除也叔寶至長安館於都水臺上高臺之義也

魏太武太延元年白燕集於盛樂舊都元鳥隨之以千數白雉三集於平陽太祖之廟

北齊孝昭帝卽位之後有雉飛上御座占同中大同元年又有鳥止於後園其色赤形似鴨而有九頭其年帝崩武成胡后生後主初有梟升后帳而鳴梟不孝之鳥不祥之應也後主嗣位胡后淫亂事彰遂幽后於北

宮焉 後主天統三年九月萬春鳥集仙都苑京房易
飛候曰非常之鳥來宿於邑中邑有兵周師入鄴之應
也 武平七年有鸛巢太極殿又巢并州嘉陽殿雉集
晉陽宮御坐獲之京房易飛候曰鳥無故巢居君門及
殿屋上邑且虛其年國滅

北周靜帝大象二年二月有禿鶯集洛陽宮太極殿其
年帝崩後宮常虛

隋文帝開皇初梁主蕭琮新起後有鴻鳥集其帳隅未
幾琮入朝被留於長安梁國遂廢 煬帝大業四年蜀
郡獲三足鳥 八年帝征遼東次大頓見二大鳥高丈

餘皜身朱足游詠自若上異之命工圖寫并立銘頌
十二年二月甲子夜有二大鳥似鷗飛入大業殿止於
御幄至明而去 大業末京師宮室中恒有鴻鴈之類
無數翔集其間俄而長安不守 十三年十一月鳥鵲
巢帝帳幄驅不能止帝尋逢弒

唐高祖武德初隋將堯君素守蒲州有鵲巢其砲機

太宗貞觀十六年立晉王爲太子雌雉集太極殿前雄
雉集東宮顯德殿前太極三朝所會也帝以問褚遂良
對曰昔秦文公時有童子化爲雉雌者鳴於陳倉雄者
鳴於南陽童子曰得雄者王得雌者霸文公遂以爲寶

雞祠漢光武得雄遂起南陽有四海陛下舊封秦王故
雄雉見秦地所以彰明德也上悅 十七年春齊王祐
爲齊州刺史好畜鴨有狸嚙鴨頭斷者四十餘 高宗
永徽四年宋州人蔡道基舍傍有獸高丈餘頭類羊一
角鹿形馬蹄牛尾五色有翅占曰鳥如畜形者有大兵
五年七月辛巳萬年宮有小鳥如雀生子大如鴟鳩
調露元年鳴鷄羣飛入塞相繼蔽野至二年正月還
復北飛至靈夏北悉墮地而死視之皆無首 武后文
明後天下屢奏鷓鴣化爲雄或半化者 中宗景龍四
年六月辛巳朔鳥集太極殿梁驅之不去 元宗開元

十二年十一月戊子雄雉馴飛泰山齋宮內封禪所以
告成功祀事無重於此者而野鳥馴飛不忌禁衛不祥

二十五年四月濮州兩鳥兩鵲兩鸚鵡同巢隴州鵲
哺慈烏 二十八年四月庚辰慈烏巢宣政殿拱辛巳

又巢宣政殿拱 天寶十三載葉縣有鵲巢於車轍中
不巢木而巢地失其所也 肅宗至德二載三月安祿

山將武令珣圍南陽有鵲巢於城中砲機者三雛成乃
去 代宗大歷八年九月武功獲大鳥肉翅狐首四足

有爪長四尺餘毛赤如蝙蝠羣鳥隨而噪之近羽蟲孽
也 十三年五月左羽林軍有鸚鵡乳鵲二 德宗貞

元四年三月中書省梧桐樹有鵲以泥爲巢鵲巢知歲
次於羽蟲爲有知今以泥露巢遇風雨壞矣是歲夏鄭
汴境內烏皆羣飛集魏博田緒淄青李約境衙木爲城
高二三尺方十里緒惡而焚之信宿又然烏口皆流血
九年春許州鵲哺烏雛 十年四月有大鳥飛集宮
中食雜骨數日獲之不食死六月辛未晦水鳥集左藏
庫七月懷州奏獲白鵲二 十一年二月同州進五色
鷹八月潞州進白鵲十一月潭州進赤烏 十二年七
月河陽進鸚鵡二 十三年懷州鷓鴣巢內有黃鵲往
來哺食 十四年秋有異鳥色青類鳩鵲見於宋州郊

外所止之處羣鳥翼衛朝夕唵稻粱以哺之睢陽人適
野聚觀者旬日 十八年六月烏集徐州之滕縣唵柴
爲城中有白烏一碧烏一 憲宗元和元年常州鵲巢
於平地 四年十二月羣鳥夜集於太行山上 十三
年春淄青府署及城中烏鵲互取其雛各以哺子更相
搏擊不能禁 穆宗長慶元年六月鄆州奏雷澤縣界
有烏巢因風墜二雛鵲引而哺之 敬宗寶歷元年十
月丙申羣鳥夜鳴 文宗開成元年閏五月丙戌烏集
唐安寺逾月散雀集元法寺燕集蕭望之家 二年三
月真興門外鵲巢於古塚鵲巢知避歲而古占又以高

下水旱今不巢於木而穴於塚不祥是秋突厥鳥自塞北羣飛入塞 五年六月有禿鶯羣飛集禁苑鶯水鳥也 武宗會昌元年潞州長子有白頸鳥與鵲鬪 宣宗大中十年三月舒州吳塘堰有衆禽成巢闊七尺高一尺水禽山鳥無不馴狎中有如人面綠毛紺爪觜者其聲曰甘人謂之甘蟲占曰有鳥非常來宿于邑中國有兵人相食 懿宗咸通七年涇州靈臺百里戍有雀生鶯至大俱飛去京房易傳曰賊臣在國厥妖鶯生雀雀生鶯同說 十一年夏雉集河內縣署 咸通中吳越有異鳥極大四目三足鳴山林其聲曰羅平占曰國

有兵人相食 僖宗乾符四年春廬江縣北鵲巢於地 六年夏鴟雉集於偃師南樓及縣署劉向說野鳥入處宮室將空 廣明元年春絳州翼城縣有鵠鷓鳥羣飛集縣署衆鳥逐而噪之光啓元年二年復如之鵠鷓一名訓狐 中和元年三月陳留有鳥變爲鵲 二年有鵲變爲烏古者以烏卜軍之勝負烏變爲鵲民從賊之象鵲復變爲烏賊復爲民之象 三年新安縣吏家捕得雉養之與雞馴月餘相與鬪死 四年臨淮漣水民家鷹化爲鶯而弗能游鷹以鶯而擊武臣象也鶯雖毛羽清潔而飛不能遠無搏擊之用充庖厨而已 光

啓元年十二月陝州平陸集津山有雉二首向背而連
頸者棲集津倉廡後數月羣雉數百來鬪殺之 二年
正月闈鄉湖城野雉及鳶夜鳴七月中條山鵲焚其巢
京房易傳曰人君暴虐鳥焚其巢 三年十月慈州作
城梟與鷓鬪相殺 昭宗光化二年幽州節度使劉仁
恭屠貝州去夜有鷓鷯鳥十數飛入帳中逐去復來
昭宗時有禿鷲鳥巢寢殿隅帝親射殺之 天復二年
帝在鳳翔十一月丁巳日南至夜驟風有鳥數千迄明
飛噪數日不止自車駕在岐常有鳥數萬棲殿前諸樹
岐人謂之神鴉 三年宣州有鳥如雉而大尾有火光

如散星集於戟門明日大火曹局皆盡惟兵械存

後唐明帝天成二年五月懷州進白鵲六月兗州進三

足鳥 廢帝清泰元年十月辛未巳時有雉金色自南

飛入中書止於政事堂屋脊上吏驅之不去良久飛入

於民家得之

其年李愚劉
昫並罷相

後晉高祖天福八年三月有白鳥棲於作坊桐樹

後漢高祖乾祐三年五月太原進白鳥

後周太祖廣順三年六月河南河北諸州旬日內無鳥

既而聚澤潞之間山谷中集於林木壓樹枝皆折

是年
人疾

疫甚衆至顯德元年河東劉崇爲
周師所敗伏尸血流故先萌其兆

世宗顯德元年二

月潞州高平縣有鵲巢於縣郭之南平地巢中七八雛
三年潁州進白鳥

宋太祖乾德六年西川兵馬都監張延通獻白鵲 太
宗太平興國五年七月祕書丞郭延釗獻紫鵲 九年
江陵獻綠鵲易州獻紅山鵲潁州獻白雉西京獻白鳩
至道元年四月知通利軍錢昭序獲赤鳥以獻上曰
鳥色正如渥丹正火德之應也貝州獻白鶴鶉越州獻
白鸚鵡九月京師自旦至酉羣鳥百餘萬飛翔有聲如
風識者云突厥雀亦云蕃雀 眞宗咸平二年八月黃
州羣雞夜鳴至冬不止 太中祥符二年春昇州見黃

雀羣飛蔽日有從空墜者占主民有役事是歲火延州
天建節道場有禽素質脩毛赤味丹趾集壇側槐樹醮
罷方去是秋有禽白質丹味飛止禁中殿隅逐之至天
書殿而隱 三年三月禁中有禽止殿檻馴擾無畏宮
人以袂捧而獻采毛脩頸惟飲水不粒食 五年七月
乙酉建安軍鑄聖像所啓道場神雀五色修尾黃喙集
塑像上九月庚辰復有神雀丹味黃腹背翅青綠集玉
皇殿幕馴擾不驚 六年十月代州五臺山有吉祥鳥
見形翅甚大其飛也四黃鳥導之四鵲從之泰山興工
有鳥狀烏味趾皆赤役夫稍憇卽飛鳴作起之聲衆工

見其來畚鍤爭進將哺而去日以爲常目以爲催工鳥
仁宗寶元元年二月乙酉興州長舉縣有鵲羽毛潔
白背脚紅不類常鵲 英宗治平三年五月太子右贊
善大夫陳世脩獻白鳥 神宗熙寧七年六月乙未廣
州言增城縣鳳凰見 元豐三年八月戊寅趙州平棘
縣獲白鵲九月丙午趙州獲白鳥 六年七月壬申丹
州生白雀 徽宗政和三年九月大饗明堂有鶴回翔
堂上明日又翔於上清宮是時所在言瑞鶴宰臣等表
賀不可勝紀 宣和元年九月戊午蔡京等表賀赤鳥
又賀白鵲 政和後禁苑多爲林居野店又聚珍禽野

獸麀鹿鴛鴦禽鳥數百實其中至宣和間每秋風夜靜
禽鳥之音四徹宛若深山大澤陂野之間識者以爲不
祥 宣和末南郊禮畢御郊宮端誠殿天未明百辟方
稱賀忽有鴉正鳴於殿屋若與贊拜聲相應和聞者駭
之時已報女真背盟未踰月內禪明年有青城之難
高宗建炎三年上在揚州二月辛亥早朝有翠羽飛鳴
行殿三匝一再止於宰臣汪伯彥朝冠冠者尊服飛鳥
踐之不祥翠羽又青祥也劉向以爲野鳥入宮室將空
一曰敗亡之應是日虜兵入揚州有倉卒渡江之變後
二十日伯彥罷相尋坐貶 四年五月丁巳虜兵圍陝

府鳶鴉數萬飛噪城上與戰聲相亂虜將婁宿曰城當陷急攻之遂失守近羽孽也 七年梟鳴於劉豫後苑又羣鳥鳴於內庭如曰休也豫惡之募人獲一梟者予錢五千是歲豫廢僞齊亡 十七年二月有白鳥六集於高禰壇上近羽孽也宰臣沈該以瑞奏 二十七年饒州鄱陽縣有妖鳥鳧身雞尾長喙方足赤目上於民屋數日彈矢不能中亦羽孽也 孝宗乾道六年邵武軍泰寧縣有爵飛鳴立死於瑞寧佛刹香鼎先是紹興初是邑有爵立死於丹霞佛刹之鼎皆羽孽也釋子因釋其妖謂之雀化 寧宗慶元三年春池州銅陵縣鴛

鴛雄化鷗近羽孽也

文獻通考卷第三百十一

文獻通考卷第三百十三

鄗 陽 馬 端 臨 貴 與 著

物異考十九

鳳凰

虞舜簫韶九成鳳凰來儀

韶舜樂名言簫見細樂之備雄曰鳳雌曰凰靈鳥也儀有

容儀備樂九奏而致鳳凰則餘鳥獸不待九而率舞

漢昭帝始元三年冬十月鳳凰集東海遣使者祠其處

宣帝本始元年五月鳳凰集膠東千乘 四年五月

鳳凰集北海安邱淳于 地節二年四月鳳凰集魯郡

羣鳥從之 元康二年三月以鳳凰集賜天下吏民爵

女子牛酒鰥寡高年帛 神爵二年鳳凰集京師羣鳥
從者以萬數 四年冬十月鳳凰十一集杜陵十二月
鳳凰集上林 五鳳三年鸞鳳集長樂宮東闕中樹上
飛下止地文章五色

東坡蘇氏曰黃霸傳言時鳳凰神爵數集郡國潁
川尤多天子以霸治行長者下詔稱揚此可疑也
霸以鵠爲神爵不知潁川之鳳以何物爲之邪
致堂胡氏曰孝宣之世誠安且治矣然方之堯舜
成康可封刑措之俗無乃尚遠有不及乎鳳凰何
爲而屢至哉自本始逮黃龍二十五年間天變則

日食星孛大雨雹地變則四十九郡同日震山崩
壞宗廟殺人民以人事論之趙蓋楊韓四良臣無
罪而死元康二年中子弟殺父兄妻殺夫者二百
四十二人魏相以爲大故者不論他年然則世雖
安治亦多舛逆不得稱太平決矣鳳凰表太平之
瑞也何爲而至哉宣帝繼武帝之後撫養百姓不
興兵革親致康阜其心自喜必有窺見微意者故
爭言祥瑞以侈耀之雖然所謂鳳者非也何以明
之黃霸以鵠爲神爵而神爵年號非有他異焉乃
爲鳳凰而名之然則其時公以鵠爲神爵神爵爲

鳳凰則鳳凰羣集非鷦而何雖明治安而未及古
正使有鳳尚不足貴况非鳳邪此可破千載之疑
而發一笑為後世自欺之戒也或曰漢權歸外家
自王鳳始殆天以告爾然則尤當警懼者也

後漢章帝元和三年正月鳳凰集肥城五月詔曰乃者

鳳凰黃龍鸞鳥比集七郡孫之柔瑞圖曰鸞鳥者赤神

赤被五采鳴中五音人君進退或有度親疎有序則至也比頻也或一郡再見其賜天下

吏民爵及帛有差 安帝延光三年新豐上言鳳凰集

西界亭今新豐縣西原有鳳凰原俗傳二月戊子有五

色大鳥集濟南臺十月又集新豐時以為鳳凰陽明之

應故非明主則隱不見凡五色大鳥似鳳者多羽蟲之

孽是時安帝信中常侍樊豐江京阿母王聖及外屬耿

寶等讒言免太尉楊震廢太子為濟陰王不愆之異也

章帝末號鳳凰百四十九見時直臣何敞以為羽孽

似鳳翱翔殿屋不察也臣昭曰已論記者以為其後章

帝崩以為驗按宣帝明帝時五色鳥羣翔殿屋賈逵以

為胡降徵帝多善政雖有過不及至衰缺末年胡降二

十萬口爾其驗也帝之時羗胡外叛讒慝內興羽孽之

時也樂叶圖徵說五鳳皆五色為瑞者一為孽者四叶

徵曰似鳳有四並為妖一日鸛鵲鳩喙圓目身義戴信

嬰禮膺仁負智至則旱疫之感也二曰發明鳥喙大頸

翼大身仁戴智嬰義膺信負禮至則喪之感也三日焦
明長喙疏翼圓尾身義戴信嬰仁膺智負禮至則水之
感也四曰幽昌銳目小頭大身細足脰若鱗葉身智戴
信負禮膺仁至則早之感也國語曰周之興也鸞鷟鳴
岐說文曰五方神鳥東方曰發明南方曰焦
明西方曰鸛鵠北方曰幽昌中央曰鳳凰
桓帝元

嘉元年十一月五色大鳥見濟陰已氏時以為鳳凰此

時政治衰缺梁冀秉政阿枉上幸亭后皆羽孽時也

按魏朗對策桓帝時雉入太常宗正府朗說見本傳註靈帝光和四年秋五色

大鳥見於新城眾鳥隨之時以為鳳凰時靈帝不恤政

事常侍黃門專權羽孽之時也眾鳥之性見非常斑駁

好聚觀之至於小爵希見梟者遽見猶聚

魏文帝黃初元年八月石邑縣言鳳凰集

吳孫權黃武四年蒼梧言鳳凰見 黃龍元年夏口武

昌並言鳳凰見 孫亮建興二年有大鳥五見於春申

吳人以為鳳凰 詳見羽蟲門 孫皓建衡三年西苑言鳳凰

見明年改元鳳凰

晉武帝泰始元年郡國言鳳凰見凡六 二年鳳凰六

見 五年鳳凰見於趙國 穆帝升平四年二月鳳凰

將九雛見於豐城十一月鳳凰復見於豐城羣鳥隨之

五年鳳凰見於沔北

宋文帝元嘉十四年正月戊戌鳳凰二見於都下眾鳥

隨之改其地曰鳳凰里

周武帝天和元年七月梁州上言鳳凰集楓樹衆鳥列侍以萬數

唐武后長壽三年十一月陳州上言苑邱縣鳳凰集衆鳥數萬前後翊從行列齊整色別爲羣後三日改元儀鳳

蜀王建元年鳳凰見萬歲縣

漢劉晟時鳳凰見邕州

宋太宗端拱元年八月有鳳凰集廣州清遠縣廨舍栢樹高六尺衆鳥隨之向東北去 眞宗景德元年五月白州有三鳳自南來入城中羣禽周繞至萬歲寺前棲

百尺木龍樹身長九尺高五尺其文五色冠如金杯
神宗熙寧七年六月乙未廣州言增城縣鳳凰見

雞禍

春秋左氏傳周景王時大夫賓起見雄雞自斷其尾劉向以爲近雞禍也時王有愛子子朝王與賓陰謀欲立之田於北山將因兵衆殺適子之黨未及而崩王子爭國王室大亂其後賓起誅死子朝奔楚而敗京房易傳曰有始無終厥妖雄雞自斷其尾

漢宣帝黃龍元年未央殿輅軫中雌雞化爲雄輅與路同軫音零廐名也 毛衣變化而不鳴不將無距將謂率領其羣距雞附足骨鬪時所用刺

之元帝初元中丞相府史家雌雞伏子漸化爲雄冠
距鳴將 永光中有獻雄雞生角者京房易傳曰雞知
時知時者當死房以爲已知時恐當之劉向以爲房失
雞占雞小畜主司時起居人爲人起居之節小臣執事爲政之
象也言小臣將秉君威以害正事猶石顯也竟寧元年
顯伏辜此其驗也或曰顯何足以當此昔武王伐殷誓
師曰牝雞無晨牝雞之晨惟家之索今殷王受惟婦言
是用由是論之黃龍初元永光雞變迺國家之占妃后
妃象也黃龍元年宣帝崩元帝立王妃將爲后故是歲
未央殿雌雞化雄明其占在正宮也不鳴不將無距貴

始萌而尊未成也初元元年立王妃爲后后以后父丞
相少史王禁爲陽平侯明年立皇后子爲太子故應是
丞相府史家雌雞化爲雄其占卽丞相少史之女也伏
子者明已有子也冠距鳴將者尊已成也永光二年禁
薨子鳳嗣侯元帝崩成帝遂委政於元舅王氏之權自
鳳始故於鳳始受爵位時雄雞有角明視作威專君害
上危國者從此人始也京房易傳曰賢者居明夷之世
知時而傷或衆在位厥妖雞生角時主獨又曰婦人顛
政國不靜牝雞雄鳴主不榮故房以爲已亦在占中矣
後漢靈帝光和元年南宮侍中寺雌雞欲化雄一身毛

皆似雄但頭冠尚未變詔以問議郎蔡邕邕對曰貌之不恭則有雞禍臣竊推之頭元首人君之象今雞一身已變未至於頭而上知之是將其事而不遂成之象也若應之不精政無所改頭冠或成爲患滋大是後張角作亂稱黃巾破壞四方

魏明帝景初二年廷尉府中雌雞化爲雄不鳴不將干寶曰是歲宣帝平遼東百姓始有與能之義此其象也然晉三后並以人臣終而不鳴不將又天意也

晉惠帝元康六年陳國有雞生雄雞無翅旣大墜坑而死王隱以爲雄者允嗣子之象坑者母象今雞生無翅

墜坑而死此子無羽翼爲母所陷害乎於後賈后誣殺愍懷此其應也 秦安中周玘音起家雌雞逃承雷中六

七日而下奮翼鳴將獨毛不變其後有陳敏之事敏雖

控制江表終無紀綱文章殆其象也卒爲玘所滅雞禍

見玘家又天意也京房易傳曰牝雞雄鳴主不榮 元

帝太興中王敦鎮武昌有雌雞化爲雄天戒若曰雌化爲雄臣陵其上其後王敦再攻京師 孝武太元十三

年四月廣陵高平閻嵩家雌雞生無右翅彭城人劉象

之家雞有三足京房易傳曰君用婦人言則雞生妖是

時主相並用尼媪烏堯反之言寵賜過厚故妖象見焉

安帝隆安元年八月琅邪王道子家青雌雞化爲赤雄
雞不鳴不將桓元將篡不能成業之象 四年荊州有
雞生角角尋墮落是時桓元始擅西夏狂慢不肅故有
雞禍天戒若曰角兵象尋墮落者暫起不終之妖也後
皆應也 元興二年衡陽有雌雞化爲雄八十日而冠
萎天戒若曰衡陽桓元楚國之邦略也及桓元篡位果
八十日而敗此其應也

隋文帝開皇中有人上書言頻歲已來雞鳴不鼓翅類
腋下有物而妨之翮不得舉肘腋之臣當爲變矣書奏
不省京房易飛候曰雞鳴不鼓翅國有大害其後大臣
多被夷滅諸王廢黜太子幽廢 煬帝大業初天下雞
多夜鳴京房易飛候曰雞夜鳴急令又云昏而鳴百姓
有事人定鳴多戰夜半鳴流血漫漫及中年已後軍國
多務用度不足於是急令暴賦責成守宰百姓不聊生
矣各起而爲盜戰爭不息屍骸被野

唐武后垂拱三年七月冀州雌雞化爲雄 永昌元年
明州松州各有雌雞化爲雄 中宗景龍二年春滑州
匡城縣民家雞有三足京房易傳占曰君用婦言則雞
生妖 元宗好鬪雞貴臣外戚皆尚之貧臣或弄木雞
識者以爲雞西屬帝王之歲鬪者兵象近雞禍 宣宗

大中八年九月考城縣民家雄雞化為雌伏子而雄鳴
 雄化為雌王室將卑之象反雌伏也漢宣帝時有此異
 至元帝而王氏始萌蓋馴致其禍也 懿宗咸通六年
 七月徐州彭城民家雞生角角兵象雞小畜猶賤類也
 宋高宗紹興初陳州民蓄雞忽人言近雞禍也後河南
 為偽齊所據時松陽縣民家雞生三足與唐志景龍中
 雞禍同占縣治有雞伏卵毛生殼外近雞禍亦毛孽也
 孝宗乾道六年衢州西安縣官塘有物怪雞首人身
 高丈餘晝見於野 寧宗慶元三年饒州壘舍雞卵出
 蛇近雞孽亦蛇孽也徽州婺源縣張村民家雌雞化為
 雛有三足

龍蛇之異

雄烹之形冠距而腹卵孕同里洪氏家雄雞伏子中一
 雛有三足

夏孔甲之時天降二龍有雌雄孔甲不能食未得豢龍
 氏豢養也穀食日豢陶唐既衰其後有劉累學擾龍擾音柔馴也能順養
 得其於豢龍氏以事孔甲孔甲賜其姓曰御龍氏更豕
 韋之後龍一雌死潛醢以食夏后夏后享之既而使求
 之懼而遷去 史記夏后氏之衰有二龍止於夏庭而
 言余褒之二君也褒古國名夏帝卜殺之去之止之莫吉卜
 請其爨而藏之乃吉應劭曰爨沫也鄭氏曰爨音牛齒之齒師古曰去謂驅逐也止謂拘

留也去音邱邱呂於是布幣策告之師古曰奠幣為禮讀策詞而告之也說者

反為策者輝龍亡而祭在乃匱去之師古曰匱匱也去藏也匱音讀去音

邱呂其後夏亡傳匱於殷周三代莫發至厲王末發而

觀之祭流於庭不可除也厲王使婦人羸而譟之應劭曰羸

呼曰譟師古曰祭化為元龜韋昭曰元黑龜也蜃蜴也似蛇而有足師古曰龜似

而大非入後宮處妾遇之而孕師古曰處妾生子懼

而棄之宣王立女童謠曰麋弧萁服實亡周國服虔曰

也師古曰女童謠間里之童女為歌謠也麋山桑之有

點文者也木弓曰弧服盛箭者即今之步叉也萁草似

一簞反萁音基後有夫婦鬻是器者宣王使

執而僂之師古曰鬻賣也音戈六反既去見處妾所棄妖子聞其夜

號哀而收之遂亡奔褒後褒人有罪入妖子以贖是為

褒姒幽王見而受之生子伯服王廢申后及太子宜臼

而立褒姒伯服代之廢后之父申侯與繒西畎戎共攻

殺幽王師古曰畎戎即詩曰赫赫宗周褒姒威之師古

雅正月之詩也赫赫盛貌也宗劉向以為夏后季世周

之幽厲皆諄亂逆天師古曰諄惑也音布內反故有龍龜之怪近龍

蛇孽也祭血也一曰沫也麋弧桑弓也萁服蓋以萁草

-5 200 45 915" data-label="Text">

為箭服近射妖也女童謠者禍將生於女國以兵寇亡也師古曰因婦以致兵寇也

乾隆十二年校刊

物異十九

劉向以爲近蛇孽也先是鄭厲公劫相祭仲逐兄昭公代立後厲公出奔昭公復入死子儀代立厲公自外劫大夫傅瑕使僂子儀此外蛇殺內蛇之象也蛇死六年而厲公立莊公問申繻曰猶有妖乎對曰人之所忌其氣災以取之妖由人興也人亡釁焉妖不自作人棄常故有妖京房易傳曰立嗣子疑厥妖蛇居國門鬪文公十六年夏有蛇自泉宮出泉宮卽泉臺入於國如先君之數劉向以爲近蛇孽也泉宮在囿中公母姜氏曾居之蛇從之出象宮將不居也詩曰維虺維蛇女子之祥又蛇入國國將有女憂也秋公母薨公惡之乃毀泉臺後

二年公薨公子遂殺文之二子而立宣公文公夫人大歸於齊 昭公十九年龍鬪於鄭時門之外洧淵劉向以爲近龍孽也鄭以小國攝乎晉楚之間重以強吳時子產任政內惠於民外善辭令以交三國鄭卒亡患能以德消變之效也京房易傳曰衆心不安厥妖龍鬪漢高祖母媪常息大澤之陂休息而寢也夢與神遇是時雷電晦冥父太公往視則見交龍其上巳而娠遂產高祖高祖爲亭長送徒驪山被酒夜經澤中有大蛇當徑乃拔劍斬蛇蛇分兩頭詳見人異門 惠帝二年正月癸酉旦有兩龍見於蘭陵延東里温陵井中至乙亥夜去劉

向以為龍貴象而困於庶人井中象諸侯將有幽執之禍其後呂太后幽殺三趙王諸呂亦終誅滅京房易傳曰有德將害厥妖龍見井中又曰行刑暴惡黑龍井出文帝十五年黃龍見於成紀 武帝太始四年七月趙有蛇從郭外入與邑中蛇鬪孝文廟下邑中蛇死二

年秋有衛太子事事自趙人江充起 宣帝甘露元年

黃龍見新豐 成帝鴻嘉元年冬黃龍見真定

後漢光武建武十二年六月黃龍見東河 章帝建初

五年有八黃龍見於泉陵 伏侯古今註曰見零陵泉陵湘水中相與戲其二大如馬

有角六枚大如駒無角 安帝延光元年九真言黃龍見無功歷

城琅邪言黃龍見時安帝聽讒免太尉楊震楊震自殺

又帝獨有一子以為太子信讒廢之是皇不中故有龍

孽時多用佞媚故以為瑞應明年正月東郡又言黃龍

二見濮陽 桓帝建和元年沛國言黃龍見譙 元嘉

二年濟陰言黃龍見句陽金城言黃龍見允街 桓帝

即位有大蛇見德陽殿上雒陽市令淳于翼曰蛇有鱗

甲兵之象也見於省中將有椒房大臣受甲兵之誅也

其後梁冀以逆誅 延熹七年六月壬子河內野王山

上有龍死長可數十丈 袁山松書曰長可百餘丈 裴楷以為夫龍者

為帝王瑞易論大人天鳳中黃山宮有死龍漢兵誅莽

而世祖復興此易代之徵也至建安二十五年魏文帝
代漢臣昭曰夫屈申躍見變化無方非顯死之體橫強之畜易况大聖實類君道野王之異豈桓帝將崩之表乎妖等占殊其例斯衆苟欲附會以同天鳳則帝陟三主年踰五十此為迂闊將恐非徵矣永

康元年八月巴郡言黃龍見時吏傅堅以郡欲上言內
白事以為走卒戲語不可太守不聽嘗見堅語云時民
以天熱欲就池浴見池水濁因戲相恐此中有黃龍語
遂行人間聞郡欲以為美故言時史以書帝紀桓帝時
政治衰缺而在所多言瑞應皆此類也又先儒言瑞興
非時則為妖孽而民訛言生龍語皆龍孽也 靈帝建
寧二年夏青蛇見御座軒前張奐上疏言陳蕃竇氏未

被明宥妖青之來皆為此也

敦煌實錄曰蛇長六尺夜於御前當軒而見

熹平元年甲午青蛇見御座上是時靈帝委任宦者王
室微弱 五年沛國言黃龍見譙光祿大夫橋元問太
史令單颺此何祥也曰其國後當有王者興不及五十
年亦當復見天事恒象此其應也內黃殷登默而記至
四十五年登尚在時延康元年魏王丕嗣位三月黃龍
見譙登聞之曰單颺之言其驗茲乎

魏明帝青龍元年正月甲申青龍見邾之摩陂井中凡
瑞興非時則為妖孽况困於并非嘉祥矣魏以改年非
也干寶曰自明帝終魏世青龍黃龍見者皆其主廢興

之應也魏土運青木色而不勝於金黃得位青失位之象也青龍多見者君德國運內相尅伐也故高貴鄉公卒敗於兵按劉向說龍貴象而困井中諸侯將有幽執之禍也魏世龍莫不在井此居上者逼制之應高貴鄉公著潛龍詩卽此旨也 高貴鄉公正元元年戊戌黃龍見於鄴井中 甘露元年正月辛丑青龍見軹縣井中六月乙丑青龍見元城縣界井中 二年二月青龍見溫縣井中 三年黃龍青龍俱見頓邱冠軍陽夏縣界井中 四年正月黃龍一見寧陵縣界井中 元帝景元元年十二月甲申黃龍見華容縣井中 三年二

月龍見軹縣井中

吳孫權黃武元年鄱陽言黃龍見 黃龍元年夏口武

昌並言黃龍見權卽皇帝位改元 赤烏五年海鹽言

黃龍見 九年雲陽言黃龍見 孫休永安四年九月

布山言白龍見 五年始新言黃龍見 六年泉陵言

黃龍見又長沙言青龍見 孫皓天冊中龍乳於長沙

人家啖雞雛京房易傳曰龍乳人家王者爲庶人其後

皓降晉

晉武帝泰始元年郡國言白龍見凡二 一二年青龍十

見黃龍九見 三年白龍一見弘農澠池 五年青龍

乾隆十二年校刊

物異十九

十四

二見於滎陽白龍二見於趙國 六年白龍二見於東
 筦 咸寧二年六月白龍二見新興井中又見武庫井
 中十一月白龍二見於梁國 太康元年白龍三見於
 永昌 二年白龍二見於濟南 五年白龍見京兆
 九年青龍黃龍各一見於魯國又龍見武庫井中帝觀
 之有喜色百僚將賀劉毅獨表曰昔龍漉俟滋反夏庭禍
 發周室龍見鄭門子產不賀帝答曰朕德政未修未有
 以應受嘉祥遂不賀也孫盛曰龍水物也何與於人子
 產言之當矣但非其所處實為妖災夫龍以飛翔顯見
 為瑞今則潛伏幽處非休祥也漢惠帝二年兩龍見蘭

陵井中本志以為其後趙王幽死之象武庫者帝王威
 御之器所寶藏也屋宇邃密非龍所處是後七年藩王
 相害二十八年果有二胡僭竊神器二逆皆字曰龍此
 之表異為有證矣 愍帝建興二年十一月枹罕羌妓
 產一龍子色似錦文常就母乳遙見神光少得就視此
 亦皇極不建於是帝竟淪沒

呂纂末龍出東廂井中到其殿前蟠卧比旦失之俄
 又有黑龍升其宮門咸以為美瑞或曰龍者陰類出
 入有時今而屢見必有下人謀上之變後纂果為呂
 超所殺

武帝咸寧中司徒府有二大蛇長十許丈居聽事平櫟
音老上而人不知但數年怪府中數失小兒及猪犬之屬
 後有一蛇夜出被刃傷不能去乃覺之發徒攻擊移時
 乃死夫司徒五教之府此皇極不建故蛇孽見之漢靈
 帝時蛇見御座楊賜以為帝溺於色之應也魏代官人
 猥多晉又過之燕游是酒此其孽也詩云維虺維蛇女
 子之祥也 惠帝元康五年三月癸巳臨淄有大蛇長
 十餘丈負二小蛇入城北門逕從市入漢城陽景王祠
 中不見天戒若曰昔漢景王有定傾之功而不厲節忠
 慎以至失職奪功之辱今齊王罔不悟雖建興復之功

而驕陵取禍此其徵也 明帝太寧初武昌有大蛇常
 居故神祠空樹中每出頭從人受食京房易傳曰蛇見
 於邑不出三年有大兵國有大憂尋有王敦之逆 恭
 帝元熙元年冬東方黑龍四登於天易傳曰冬龍見天
 子亡社稷大人受命

慕容皝時有黑龍白龍各一見於龍山皝率羣寮觀
 之去龍二百步祭以太牢二龍交首嬉翔解角而去
 皝大悅赦其境內號新宮曰和龍

宋高祖微時行止時見二小龍附翼樵漁山澤同侶或
 亦觀焉及貴龍形更大後伐荻新洲見大蛇長數丈射

之傷明日復至洲裏聞有杵臼聲及往覘之見有童子
數人皆著青衣於榛中搗藥問其故答曰我王爲劉寄
奴所射合散傳之帝曰王神何不殺之答曰寄奴王者
不死不可殺也帝叱之皆散仍收藥而反 文帝發江
陵有黑龍躍負上所乘舟左右莫不失色上謂王曇首
曰此乃夏禹所以受命吾何德以堪之至都羣臣勸進
卽位

齊東昏侯永元三年七月丙辰龍鬪於建康淮激水五
里

梁武帝天監二年北梁州潭中有龍鬪潰霧數里龍蛇

之孽洪範五行傳曰龍獸之難害者也天之類君之象
天氣害君道傷則龍亦害鬪者兵革之象也京房易飛
候曰衆心不安厥妖龍鬪是時帝初卽位而有陳伯之
劉季連之亂國內危懼 普通五年六月龍鬪於曲阿
王陂因西行至建陵城所經之處樹木折開數十丈與
天監二年同占經建陵而樹木折者國有兵革之禍園
陵殘毀之象時帝專以講論爲務不崇耕戰將輕而卒
情君道旣傷故有龍鬪之應帝殊不悟至太清元年黎
州水中又有龍鬪波浪涌起雲霧四合而見白龍南走
黑龍隨之其年侯景以兵來降帝納之而無備國人皆

懼俄而難作帝以憂崩 大同十年夏有龍夜因雷而墮延陵人家井中明旦視之大如驢將以戟刺之俄見庭中及室中各有大蛇如數百斛船家人奔走洪範五行傳曰龍陽類貴象也上則在天下則在地不當見庶人邑里室家井中幽深之象也諸侯且有幽執之禍皇不建之咎也後侯景反果幽殺簡文於酒庫宗室王侯皆幽死 中大同元年有大蛇鬪曲阿縣建陵隧中其一被傷奔走 元帝承聖二年有兩龍見湘州西江三年三月主衣庫見黑蛇長丈許數十小蛇隨之舉頭高丈餘南望俄失所在帝又與宮人幸元洲苑復見大

蛇盤屈如前羣小蛇遶之並黑色帝惡之宮人曰此非怪也恐是錢龍帝敕所司即日取數千萬錢鎮於蛇處以厭之因謀法會赦囚徒振窮乏退居栖心省又蛇從屋墜落帝帽上忽然便失又龍光殿上所御肩輿復見小蛇縈屈輿中以頭駕夾膝前金龍頭上見人走去逐之不及城壕中龍騰出煥爛五色竦躍入雲六七小龍相隨飛去羣魚騰躍墜死於陸道龍處爲窟若數百斛圖舊大城上常有紫氣至時稍復消歇 先時有二龍自南郡城西升天百姓聚觀五采分明江陵故老竊相泣曰昔年龍出建康淮而天下大亂今復有焉禍至無

日矣帝聞而惡之踰年遘禍

陳武帝討侯景軍頓西昌有龍見水濱高五丈五尺鮮
耀軍人觀者數萬人 永定三年正月丁酉夜大雪及
旦太極殿前有龍跡現 宣帝太建十一年正月龍見
南兖州池中與梁大同十年同占未幾後主嗣位荒淫
至於亡國爲俘 後主末年有青龍出建陽門井涌霧
又見大蛇地中分首尾各走
東魏孝靜帝太平二年龍見并州人家井中 武定元
年有大蛇見虎牢城時高仲密以虎牢叛附西魏神武
爲西兵所窘

北齊文宣天保九年有龍長七八丈見齊州大堂占同
大同十年明帝崩太子殷立常山王演廢而害之 武
成河清元年龍見濟州浴堂中占同天保九年 二年
齊州上言濟河水口見八龍升天 後主天統四年貴
鄉人伐枯桑得一黃龍折脚死於孔中齊稱木德龍君
象木枯龍死不祥之甚其年武帝崩 武平三年龍見
邯鄲井中其氣五色屬天又見汲郡佛寺澗井中占同
河清元年後主竟降周後被誅 七年并州招遠樓下
有赤蛇與黑蛇鬪數日赤蛇死赤齊尚色黑周尚色鬪
死滅亡之象也後主任用邪佞與周師連兵於晉州之

下委軍於孽臣高阿那肱竟起敵人皇不建之咎也後主遂爲周師所虜

瑯琊王儼壞北宮中白馬浮圖石趙時澄公所建見白蛇長數丈迴旋失所在時儼專誅失中之咎也見變不知戒以及於難

後周武帝建德五年黑龍墜於亳州而死龍君之象黑周所尚色墜死不祥後二歲帝崩太子立靜帝大象元年有黑龍與赤龍鬪於汴州水側黑龍死次年宣帝崩靜帝立禪於隋

隋文帝仁壽四年龍見代州總管府井中其龍或變爲鐵馬甲士彎弓上射之象變爲鐵馬近馬禍也彎弓上射又近射妖諸侯將有兵革之變致幽囚也後漢王諒坐反誅

唐太宗貞觀八年七月隴右大蛇屢見蛇女子之象大者有所象也又汾州青龍白龍見白龍吐物在空中光明如火墮地地陷掘之得元金廣尺長七寸高宗顯慶二年五月庚寅有五龍見於岐州之皇后泉睿宗先天二年六月京師朝堂磚下有大蛇出長丈餘有大蝦蟆如盤而目赤如火相與鬪俄而蛇入於大樹蝦蟆入於草蛇蝦蟆皆陰類朝堂出非其所也元宗開元

四年六月彬州馬嶺山下有白蛇與黑蛇鬪白蛇長六
七尺吞黑蛇入腹口眼血流黑蛇長丈餘頭穿白蛇腹
出俱死 天寶中洛陽有巨蛇高丈餘長百尺出芒山
下胡僧無畏見之曰此欲決水瀦洛城卽以天竺法呪
之數日地裂 十四載七月有二龍鬪於南陽城西易
坤上六龍戰于野文言曰陰疑于陽必戰 肅宗至德
元載八月朔成都丈人廟有肉角蛇見 二載三月有
蛇鬪於南陽門之外一蛇死一蛇上城 德宗建中二
年夏趙州寧晉縣沙河北有棠樹甚茂民祠之爲神有
蛇數百千自東西來趨北岸者聚棠樹下爲二積留南

岸者爲一積俄有徑寸龜三繞行積地盡死而後各登
其積野人以告蛇腹皆有瘡若矢所中刺史康日知圖
其事奉三龜來獻 四年九月戊寅有龍見於汝州城
壕龍大人象其潛也淵其飛也天城壕失其所也 貞
元十八年八月滄州言白龍見 貞元末資州得龍丈
餘西川節度使韋臯匣而獻之百姓縱觀三日爲煙所
薰而死 憲宗元和十年四月滑州言青龍見於新開
河 文宗太和二年六月丁丑西北有龍鬪 三年成
都門外有龍與牛鬪 開成元年宮中有衆蛇相與鬪
僖宗乾符三年三月奉天鎮上言金龍晝見自河升

天 光啓二年冬鄜州洛交有蛇見於縣署復見於州署蛇冬則蟄易曰龍蛇之蟄以存身也 昭宗光化三年九月杭州有龍鬪於浙江水溢壞民廬舍占同天寶十四載

蜀王建元年萬歲縣黃龍見 武定三年八月有龍五十見洵陽水中 永平二年十二月黃龍見富義江又見大昌池

宋太祖從周世祖征淮南戰於江亭有龍自水中向太祖奮躍識者驚異以爲出潛之兆 乾德五年京師雨有黑龍見尾於雲際自西北趨東南占主大水明年州

府二十四水壞田廬 六年四月單州單父縣民王美家龍起井中暴風雨漂廬舍失族屬及壞舊鎮解舍三百五十餘區大木皆拔 開寶七年六月隸州有火自空墜於城北門樓有物抱東柱如龍金色足三尺許其氣甚腥旦視之壁上有煙痕爪迹三十六 太宗太平興國二年五月白龍見寧州要冊龍廟池中長數十丈東向吐青白雲見者千餘人 真宗大中祥符元年八月青蛇出無爲軍廨長數尺許 三年內侍任文慶奉詔於茅山設醮禱郭真人池取雙龍以歸長二寸許鱗極細腹如玳瑁置手中仰覆無懼中路風雨失一五月

內出以示近臣令文慶送還茅山至華陽宮投池中俄於岸側樹上觀二龍一乃放還者一乃所失者六年五月迎奉聖祖至穀熟縣於聖祖舟中幢節上得小龍二如茅山池中畜於禁中己巳方午忽失一守者求之不獲是夜聞雷聲有光如火照淨閣翼日失者復至卽遣使送還茅山六月趙州言聖像玉石舟度河之石橋時河水淺澁有黑龍鼓浪進舟凡歷二灘悉然舟旣度河流復故詔遣官卽其所致祭上清宮先天節道場香奩中獲小龍背有金彩三道尾有翠文寸餘八月建昌軍部民家麻姑山仙都觀設醮己巳五鼓有龍出玉皇

殿西北醮壇下升中天迴視長數尺金色隱隱有雷聲聞數里神宗熙寧二年建州民楊緯言元年三月大雷雨所居之處有黃龍見下獲一木如龍而形未具七月雷雨如初復有龍飛其上及霽木龍尾翼足皆具歸合舊木宛然一體圖象以進徽宗宣和元年夏雨連晝夜凡數日及霽開封縣前茶肆中有異物如犬大蹲踞卧榻細視之身僅六七尺色蒼黑其首類驢兩頰作魚頷而色正綠頂有角坐極長於其際始分兩岐聲如牛鳴與世所繪龍無異茶肆近軍器作坊兵卒來觀共殺食之已而京城大水訛言龍復讐云高宗紹興初

朱勝非出守江州過梁山龍入其舟纜長數寸赤背綠腹白尾黑爪甲有聲日有光近龍孽也時行都柴梁橋旌忠廟有三蛇出沒庭廡大者盈尺方鱗金色首脊有金綫遇霽或變化數百於蕉卉間廟徙而蛇孽亦絕五年金虜冷山有二龍死冷氣腥焰襲人其一無角其一額有深穴如斧鑿痕虜酋吳乞買欲截其首或言不祥乃止吳乞買卒以是歲死 七年五月乙酉汴京有龍撼宣德門滅宣德二字劉豫亟命葺之君龍象也宣德帝居也非豫所宜僭撼滅亡象也是歲僞齊亡 八年夏金虜熙州灤水有蒼龍見明日爲黃龍以爪擊嬰

兒爲戲者三日有帝者服乘白馬六蟾蜍在其前是歲虜伐蒙爲蒙所敗此龍孽之尤異者也 十一年四月潭州衡山縣西北淨居岩有蛇長二丈身圓數尺黑色而方文震死山水大至先是山氣遇夜輒昏昧蛇斃而夜色始明 十六年温州平陽縣古剎老松有巢蛇食鶴鵲擊蛇蛇分三時黃岩縣蛇孽亦如之 二十五年六月江州湖口縣有赤龍橫水中如山風濤大作寒風蕭然覆舟數十艘士卒溺者數十人 三十年春撫州宜黃縣有大蛇見於丞治長二丈捕之縱數里外俄復至者數四京房易傳曰蛇見於邑三年有大兵 孝宗

乾道五年七月乙亥隆興府武寧縣龍鬪於西北大雨
 俄頃迅雷起東南二龍奔逃墜珠如輪其地復塘村牧
 童得之是邑境連歲有水裁易坤上六龍戰于野文言
 曰陰疑于陽必戰與唐志天寶十四載同占春秋書龍
 鬪于洧淵亦水祥也 光宗紹熙五年七月辛酉饒州
 紫樞坊二犬共搏一蛇俄頃三者俱斃亦蛇孽也

魚異

周武王伐紂至孟津渡河中流白魚躍入王舟中
魚者介鱗之物兵象也白者殷家之正色言殷之兵象與周之家也 武王俯取以祭
 秦始皇八年河魚大上劉向以為近魚孽也時始皇弟

長安君將兵擊趙死屯留軍吏皆斬遷其民於臨洮
長安軍至屯留而謀反乃賜死殺其兵遷其民 明年有嫪毐之誅魚陰類民象逆
 流而上者民將不從其君令為逆行也在天文魚星中
 河而處車騎滿野至於二世暴虐愈甚終用危亡京房
 易傳曰眾逆同志厥妖河魚逆流上 三十七年東巡
 並海上至之罘見巨魚射殺一魚

漢宣帝神爵元年幸河東祠后土東濟大河天氣清淨
 神魚舞河 成帝鴻嘉四年秋雨魚於信都長五寸以

下 永始元年春北海出大魚長六丈高一丈四枚

哀帝建平二年東萊平度出大魚長八丈一尺七枚皆

死京房易傳曰海數見巨魚邪人進賢人疎

後漢靈帝熹平二年東萊海出大魚二枚長八九丈高

二丈餘明年中山王暢任城王博並薨京房易傳曰海出巨魚邪人進

賢人疎臣昭謂此占符靈帝之世巨魚之出豈爲二王之妖也

魏齊王嘉平四年五月有二魚集於武庫屋上此魚孽

也王肅曰魚生於水而亢於屋介鱗之物失其所也邊

將其殆有棄甲之變乎後果有東關之敗干寶以爲高

貴鄉公兵禍之應二說皆與班固旨同

晉武帝太康中有鯉魚二見武庫屋上干寶以爲武庫

兵府魚有鱗甲亦兵類也魚極陰屋上太陽魚見屋上

象至陰以兵革之禍干太陽也至惠帝初誅楊駿廢太

后矢交館閣元康末賈后謗殺太子尊亦誅廢十年之

間母后之難再興是其應也自是禍亂構矣京房易傳

曰魚去水飛入道路兵且作

梁武帝大同十年帝幸朱方至四漸中及元武湖魚皆

驤首見於上若望乘輿者帝入宮而沒洪範五行傳魚

陰類也下人象又有鱗甲兵之應下人將舉兵圍宮而

睥睨乘輿之象其後果有侯景之亂

後周靜帝大象元年六月陽武有鯉魚乘空而鬪猶臣

下興起小人從之而鬪也明年帝崩國失政尉迥起兵

相州高祖遣兵擊敗之

隋文帝開皇十七年大興城西南四里有袁村設佛會有老翁皓首白裙襦衣來食而去衆莫識追而觀之行二里許不復見但有一陂中有白魚長丈餘小魚從者無數人爭射之或弓折弦斷後竟中之剖其腹得杭飯始知此魚向老翁也後數日漕渠暴溢射人皆溺死煬帝大業十二年淮陽郡驅人入子城鑿斷羅郎郭至女垣之下有穴其中得鯉魚長七尺餘昔魏嘉平四年魚集武庫屋上王肅以爲魚生於水而亢於屋水之物失其所也邊將殆有棄甲之變後果有東關之敗是時

長白山賊寇掠河南月餘賊至城下郡兵拒之反爲所敗男女死者萬餘人

唐武后如意中濟源路敬淳家水碾柱將壞易之爲薪中有鮎魚長尺餘猶生近魚孽也 中宗神龍中渭水

有蝦蟆大如鼎里人聚觀數日而失歲大水 元宗開

元四年安南都護府江中有大蛇首尾橫出兩岸經日而腐寸寸自斷數日江魚盡死蔽江而下十五五相附著江水臭 憲宗元和十四年二月晝有魚長尺餘墜於鄆州市良久乃死魚失水而墜於市敗滅之象也

文宗開成二年三月壬申有大魚長六丈自海入淮

至濠州招義民殺之近魚孽也 僖宗乾符六年汜水
河魚逆流而上至垣曲平陸界魚民象逆流而上民不
從君令也 光啓二年揚州雨魚占如元和十四年
宋太宗至道元年十二月廣州大魚擊海水而出魚死
長六丈三尺高丈餘 徽宗政和二年內出魚純赤色
蔡京等乞付史館拜表稱賀 七年夏中有二魚落殿
中省廳屋上 高宗建炎初越州應天寺有石眼纔方
數寸深不可探舊號鰻井有魚如鰻有鱗有耳尾有刃
跡每鰻出則郡有水旱癘疫近魚孽也 紹興十八年
漳州漳浦縣崇照鹽場海岸連有巨魚高數丈旁海人

割取肉數百車至剡目乃覺轉鬣而旁艦皆覆又漁人
獲魚長二丈餘重數千斤剖之腹橫人骼膚髮如生京
房易傳曰海見巨魚邪人進賢人疎 二十年四月秀
州海鹽縣海洋有巨鰵羣鰵從之聲如謳歌抵岸偃沙
上猶揚鬣撥刺其高齊縣門樓其長百丈縣民斃肉轉
鬣壓死十數人頷骨長二丈五尺與前孽同占 孝宗
乾道六年行都北關有鮎魚色黑腹下出人手於兩旁
各具五指 七年十一月丁亥洞庭湖巨鼃走沙擁舟
身廣長皆丈餘升舟以首足壓重艦沒水 淳熙十三
年二月庚申錢塘龍山江岸有大魚如象隨潮汐復逝

十六年六月甲辰錢塘旁江居民得魚備五色鯽首
鯉身民詭言夢得魚覺而在手猶躍事聞有司令縱之
寧宗慶元三年二月饒州景德鎮漁人得魚頰尾鯉
鱗而首異常魚鎮之老人言其不祥紹興二年嘗出後
爲水災蓋是歲五月鎮果大水皆魚孽也 嘉定十七
年海壞畿縣鹽官地數十里先是有巨魚橫海岸民鬻
食之海患凡六年而平

文獻通考卷第三百十三

文獻通考卷第三百十四

鄱 陽 馬 端 臨 貴 與 著

物異考二十

龜異

禹治水時神龜自洛出負文而列於背赤文朱字其數
皆九禹因而第之以爲九疇

宋元王二年江使神龜於河至於泉陽漁者豫且舉

網得而囚之

索隱曰且音子余切
泉陽人網元龜者

置於籠中夜半龜

來見夢於宋元王曰我爲江使於河而幕網當吾路
泉陽豫且得我我不能去身在患中莫可告語王有

德義故來告訴元王惕然而悟乃召博士衛平而問之索隱曰宋元君之臣也曰今寡人夢見一丈夫延頸而長頭

衣元繡之衣而乘輜車來見夢於寡人曰我爲江使於河而幕網當吾路泉陽豫且得我我不能去身在

患中莫可告語王有德義故來告訴是何物也衛平乃援式而起徐廣曰式音勅仰天而視月之光觀斗所指定

曰處鄉規矩爲輔副以權衡四維已定八卦相望視其吉凶介蟲先見乃對元王曰今昔王子索隱曰今昔猶昨夜

也以今日言之謂昨夜爲今昔宿在牽牛河水大會鬼神相謀漢正南北正義曰漢天河江河因期南風新至江使先來白雲壅

漢萬物盡留斗柄指日使者當囚元服而乘輜車其名爲龜王急使人問而求之王曰善於是王乃使人

馳而往問泉陽令曰漁者幾何家名誰爲豫且豫且得龜見夢於王王故使我求之泉陽令乃使吏按籍

視圖水上漁者五十五家上流之廬名爲豫且泉陽令曰諾乃與使者馳而問豫且曰今昔汝漁何得豫

且日夜半時舉網得龜莊子曰得白龜圓五尺使者曰今龜安在曰在籠中使者曰王知子得龜故使我求之豫且

曰諾卽系龜而出之籠中獻使者使者載行出於泉陽之門正晝無見風雨晦冥雲蓋其上五采青黃雲

雨並起風將而行入於端門見於東廂身如流水潤澤有光望見元王延頸而前三步而止縮頸而卻復其故處元王見而怪之問衛平曰龜見寡人延頸而前以何望也縮頸而復是何當也衛平對曰龜在患中而終昔囚王有德義使人活之今延頸而前以當謝也縮頸而卻欲急去也元王曰善哉神至於此乎不可久留趣駕送龜勿令失期衛平對曰龜者是天

下之寶也先得此龜者爲天子且十言十當十戰十勝生於深淵長於黃土知天之道明於上古游三千歲不出其域安平靜正動不用力壽蔽天地莫知其極與物變化四時變色居而自匿伏而不食春倉夏黃秋白冬黑明於陰陽審於刑德先知利害察於禍福以言而當以戰而勝王能寶之諸侯盡服王勿遣也以安社稷元王曰龜甚神靈降於上天陷於深淵在患難中以我爲賢德厚而忠信故來告寡人寡人若不遣也是漁者也漁者利其肉寡人貪其力下爲不仁上爲無德君臣無禮何從有福寡人不忍奈何不遣衛平對曰不然臣聞盛德不報重寄不歸天與不受天奪之寶今龜周流天下還復其所上至蒼天下薄泥塗還徧九州未嘗愧辱無所稽留今至泉陽

漁者得而囚之江河必怒務求報仇自以為侵因神
 與謀淫雨不霽水不可治若為枯旱風而揚埃蝗蟲
 暴生百姓失時王行仁義其罰必來此無他故其祟
 在龜後雖悔之豈有及哉王勿遣也於是元王向日
 而謝索隱曰蓋欲神之以謝天之賜向日者天之光明著見者也再拜而受擇日
 齋戒甲乙最良乃刑白雉及與驪羊以血灌龜於壇
 中央以刀剝之身全不傷脯酒禮之橫其腹腸荆支
 卜之必制其創理達於理文相錯迎使工占之所言
 盡當邦福重寶徐廣曰福音副藏也聞於傍鄉殺牛取革被鄭
 之桐徐廣曰牛革桐為鼓也草木畢分化為甲兵戰勝攻取莫
 能令衛平無言

如元王元王之時衛平相宋宋最彊龜之力也故云
 神至能見夢於元王而不自出漁者之籠身能十言
 盡當不能通使於河還報於江賢能令人戰勝攻取
 不能自留於刀鋒免剝刺之患聖能先知亟見而不
 能令衛平無言

魏陳留王咸寧二年二月朐腮縣獻靈龜歸於相府
 晉咸康中豫州刺史毛寶戍邾有一軍人於武昌市買
 得白龜長五尺置瓮中養之漸大放江中後邾城遭石
 虎攻陷赴江者莫不沉溺所養龜人被甲投水中覺如
 墮一石上須臾視之乃是先所放白龜既抵岸迴顧而

去

苻堅時高陸人穿井得龜大三尺皆有八卦堅命太卜池養之粟後死藏其骨於太廟其夜廟丞高虜夢龜謂之曰我本出將歸江南遭時不遇隕命秦庭又有人夢中謂虜曰龜三千六百歲而終終必妖興亡國之徵也

隋文帝開皇中掖庭宮每夜有人來挑宮人宮司以聞帝曰門衛甚嚴人何從入當是妖精耳因戒宮人曰若逢但斬之其後有物如人來登床宮人抽刀斬之若中枯骨其物落床而走宮人逐之因入池而沒明日帝涸

池得一龜徑尺餘上有刀跡殺之遂絕龜者水居而靈陰謀之象晉王詔媚宮掖求嗣之應云

唐武后大足初虔州獲龜六眼一夕而失 肅宗上元二年有鼉聚於揚州城門上節度使鄧景山以問族弟珽對曰鼉介物兵象也 德宗貞元三年潤州魚鱉蔽江而下皆無首 文宗太和三年魏博管內有蟲狀如龜其鳴晝夜不絕近龜孽也

秦宗權在蔡州州中忽地裂有石出高五六尺廣袤丈餘正如大龜

宋太宗太平興國二年二月鑿金明池既掘地有龜出

殆踰萬數 太平興國間永州益州饒州萬安永州新州俱獻六目龜廬州獻龜大如掌綠毛覆甲潤澤可愛 蕪州獻白龜大如錢其色瑩潔兗州衛州獻金龜餘不及錄 真宗大中祥符二年四月有黑龜甚衆沿汴水下龜介族黑北方色是歲契丹國母卒 仁宗至和元年二月癸亥信州貢綠毛龜 嘉祐八年十月鼎州芝草叢生下得異龜 徽宗大觀元年閏十月丙戌成都水使者趙霆行河得兩首龜以為瑞蔡京信之曰此齊小白所謂象罔見之而霸者也鄭居中曰首豈容有二而京主之意不可測命棄龜 政和四年端州進六目龜 五

年博州進白龜 宣和四年雄州地大震元武見於州之正寢有龜大如錢蛇若朱漆筋相逐而行宣撫焚香再拜以銀奩貯二物俄而死 高宗紹興八年五月汴京太康縣大雷雨下冰龜數十里隨大小皆龜形具手足卦文龜猶歸也龜又介物兵象也冰有消釋之象此汴京將復歸而釋兵也時秦檜主和議罷兵自是神州陸沉 孝宗乾道五年舒州民獻龜駢生二首不能伸縮郡守張棟縱之潛山近龜孽也 寧宗嘉定十四年春楚州境上龜大小死者蔽野後十年歸正人李全叛死又龜者介蟲也是時被介胄死者何可勝數

蟲異

漢武帝元鼎五年秋蛙與蝦蟇羣鬪時四將軍衆十萬

征南越開九郡

蛙黽也似蝦蟇而長脚其色青

元帝建昭元年八月

有白蛾羣飛蔽日從東都門至軹道

師古曰蛾成羣若今之蠶蛾類是也

成帝建始元年六月有青蠅無萬數

言其極多雖欲以萬數之而不

少得集未央宮殿中朝者坐

公卿以下朝會坐也

後漢光武建武三年野蠶成繭

吳孫權黃龍二年有野蠶成繭如卵

晉武帝太康四年會稽彭蠡及蟹皆化鼠甚衆復大食

稻爲災

惠帝元康中洛陽南山有虫

武庚反

作聲曰韓

尸尸識者曰韓氏將尸也言尸尸者盡死也其後韓謚誅而韓族殲焉此青祥也

苻堅將爲赦與王猛苻融密議於露堂悉屏左右堅親爲赦文猛融供進紙墨有一大蒼蠅自牖間鳴聲甚大集於筆端驅而復來俄而長安街巷市里人相告曰官今大赦有司以聞堅謂融猛曰禁中無耳屬之理事何從泄也於是赦外窮推之咸言有一小兒衣黑衣大呼於市曰官今大赦須臾不見堅歎曰其蒼蠅乎聲狀非常吾固惡之

梁武帝天監十一年新昌濟陽二郡野蠶成繭 太清

二年益州市有飛螽萬羣螫人死

周靜帝大象元年八月所在螳羣鬪各四五尺死十七
八

唐太宗貞觀十二年六月滁州言野蠶成繭於山阜

十三年野蠶食柰葉成繭大如柰其色綠凡收六千五
百七十石至十四年又收八千三百石 元宗天寶五

載九月太原奏文水縣冬蠶成繭 德宗貞元十四年

四月江西溪澗魚頭皆戴邱蚓 穆宗長慶四年五月

淄青奏登州蓬萊山谷間約四十里野蠶成繭其絲可
織 文宗太和元年鄭注篋中藥化爲蠅數萬飛去十

月陳許奏界內野蠶自生桑上三遍成繭連綿九十里
百姓收拾得並抽繰得絲綿并織成紬絹 開成二年
京城有蟻聚長五六十步闊五尺至一丈厚五寸至一
尺

宋太祖乾德四年八月京兆府野蠶成繭其絲織潤可

愛 開寶六年漢陽軍獻蛤有文隱起成龍長五寸許

金色鱗甲皎然 七年正月齊州獻野蠶繭二萬枚五

月開封府封邱縣民程鐸家發蠶簇有繭聯屬自成被

七月開封府陽武縣民家野蠶成繭 真宗大中祥符

元年五月開封府酸棗縣民程矩家蠶繭自成被色輕

重密緻柔滑非人功可及 五年五月藤州鍾津縣野蠶成繭是州不產絲蠶此食山柘而成緘絲以獻 六年八月亳州譙縣民李賁圍桑野蠶成繭奉祀經度制置使丁謂采蠶繰潺絮以獻 仁宗景祐四年五月滑州靈河縣民黃慶家蠶自成被長二丈五尺闊四尺 嘉祐二年十月深州言野蠶成繭被於原野 哲宗元祐六年閏八月定州七縣野蠶成繭 七年五月濰州北海縣蠶自織如絹成領帶 元符元年七月真定府藁城縣野蠶成繭八月真定府行唐縣野蠶成繭九月祁州深澤縣野蠶成繭織絰成萬疋 二年六月房州

房陵縣野蠶成繭 徽宗政和元年九月河南府野蠶成繭 四年湘州野蠶成繭 五年南京野蠶成繭織紬五疋綿四十兩聖繭十五兩

蝗蟲 蜚 蝻 蝻

春秋桓公五年秋螽 師古曰螽即阜螽即今之蝻 蟲也螽音終蝻音之庸反 劉歆

以為貪虐取民則螽介蟲之孽也與魚同占劉向以為介蟲之孽屬言不從是歲公獲二國之聘取鼎易邑 師古曰

日二國宋鄭也宋以郟鼎賂公鄭以泰山之田易許田也 興役起城 師古曰謂五年夏城祝邱也

諸螽畧皆從董仲舒說云 莊公二十九年有蜚劉歆以為負蟊也性不食穀食穀為災介蟲之孽 師古曰蜚音扶味反

乾隆十二年校刊

物異二十

九

蟊音煩 劉向以為蜚色青近青青也非中國所有南越盛

暑男女同川澤淫風所生為蟲臭惡師古曰蜚者中國所有非南越之蟲

未詳向所說 是時莊公取齊淫女為夫人既入淫於兩叔故

蜚至天戒若曰今誅絕之尚及不將生臭惡聞於四方

莊不悟其後夫人與二叔作亂二嗣以殺師古曰二嗣謂子般及閔

公也 卒皆被辜師古曰謂二叔哀姜皆不得其死也已解於上 董仲舒指畧同

僖公十五年八月螽劉向以為先是僖有鹹之會後城

綠陵是歲復以兵為牡邱會使公孫敖帥師及諸大夫

救徐兵比三年在外 文公三年秋雨螽于宋劉向以

為先是宋殺大夫而無罪有暴虐賦歛之應穀梁傳曰

上下皆合言甚上下皆合螽之多 董仲舒以為宋三世內取三謂襄成昭也內取於國之大夫也取讀曰娶

而至劉歆以為螽為穀災卒遇賊陰墜而死也 八年

十月螽時公伐邾取須朐城郛 宣公六年八月螽劉

向以為先是宣伐莒向後比再如齊謀伐萊 十三年

秋螽公孫歸父會齊伐萊 十五年秋螽宣亡熟歲數

有軍旅冬螽生師古曰爾雅曰螽蝮說者以為螽蝗之類蝮音蒲北反蝮徒高反 劉歆

以為螽蠹之有翼者孟康曰蠹食穀為裁黑青也董

仲舒劉向以為螽螟始生也一日螟始生是時民患上

力役解於公田解讀曰解 宣是時初稅畝稅畝就民田畝擇

乾隆十二年校刊 物異二十

美者稅其什一亂先王制而為貪利故應是而蠧生屬
羸蟲之孽 襄公七年八月螽劉向以為先是襄興師
救陳滕子邾子小邾子皆來朝夏城費 哀公十二年
十二月螽是時哀用田賦 師古曰言重斂也解在刑法志 劉向以為春
用田賦冬而螽 十三年九月螽十二月螽比三螽虐
取於民之效也 師古曰比頻也 劉歆以為周十二月夏十月也
火星既伏蟄蟲皆畢天之見變因物類之宜不得以螽
是歲再失閏也周九月夏七月故傳曰火猶西流司歷
過也

秦始皇四年十月蝗蟲自東方來蔽天

漢景帝中三年秋蝗先是匈奴寇邊中尉不害 魏不 將

車騎材官士屯高柳 四年夏蝗 武帝建元五年五

月大蝗 元光五年秋蝗 六年秋蝗先是五將軍眾

三十萬伏馬邑欲襲單于是歲四將軍征匈奴 元鼎

五年秋蝗是歲四將軍征南粵及西南夷開十餘郡

元封六年秋蝗先是兩將軍征朝鮮開三郡 太初元

年夏蝗從東方飛至燉煌 三年秋復蝗元年貳師將

軍征大宛天下奉其役連年 征和三年秋蝗 四年

夏蝗先是一年三將軍眾十餘萬征匈奴貳師七萬人

沒不還 平帝元始二年秋蝗徧天下時王莽秉政

王莽地皇三年夏蝗從東方來蜚蔽天至長安入未央宮緣殿閣草木盡

後漢光武二十八年郡國共八十蝗 二十九年四月

威武酒泉清河京兆魏郡弘農蝗 三十一年郡國大

蝗 明帝永平四年酒泉大蝗從塞外入 十五年蝗

起泰山彌行兗豫 和帝永元四年蝗 八年五月河

內陳留蝗九月京都蝗 九年蝗從夏至秋先是西羌

數反遣將軍將北軍五校征之 安帝永初四年夏蝗

是時西羌寇亂軍眾征距連十餘識曰主失禮煩苛則旱之魚螺變為蝗蟲

五年夏九州蝗京房占曰天生萬物百穀以給民用天地之性人為貴今蝗蟲四起此為

國多邪人朝無忠臣蟲與民爭食居位食祿如蟲矣不救致兵起其救也舉有道置於位命諸侯試明經此消也 六年三月去蝗處復蝗子生古今註曰郡國四十八蝗 七年

夏蝗 元初元年夏郡國五蝗 二年夏郡國二十蝗

延光元年六月郡國蝗 順帝永建五年郡國十二

蝗是時鮮卑寇朔方用眾征之 永和元年秋偃師蝗

去冬烏桓寇沙南用眾征之 桓帝永興元年七月郡

國三十二蝗是時梁冀秉政無謀獻苟貪權作虐春秋考異

郵曰貪擾生蝗 二年六月京都蝗 永壽三年六月京都蝗

延禧元年五月京都蝗臣昭按劉歆傳皆逆天時聽不聰之禍也養奮對策曰佞

邪以不正食祿饗所致謝沈書曰 靈帝熹平六年夏

七州蝗先是鮮卑前後三十餘犯塞是歲護烏桓校尉
夏育破鮮卑中郎將田晏使匈奴中郎將臧旻將南單
于以下三道並出討鮮卑大司農經用不足殷斂郡國
以給軍糧三將無功還者少半光和元年詔策問曰連
年蝗蟲至冬踊其咎焉在蔡邕對曰臣聞易傳曰大作
不時天降災厥咎蝗蟲來河圖祕徵篇曰帝貪則政暴
而吏酷酷則誅深必殺主蝗蟲蝗蟲貪苛之所致也是
時百官遷徙皆私上禮西園以爲府蔡邕對曰蝗蟲出
息不忿之作省賦
斂之費進清廉黜貪虐分損承安居省別藏以贍國用
則其救也易曰得臣無家言有天下者何私家之有
獻帝興平元年夏大蝗是時天下大亂 建安二年

五月蝗

魏文帝黃初三年七月冀州大蝗人饑按蔡邕說蝗者
在上貪苛之所致也是時孫權歸順帝因其有西陵之
役舉大衆襲之權遂背叛也

晉武帝泰始十年六月蝗是時荀賈任政疾害公直

惠帝永寧元年郡國六蝗 懷帝永嘉四年五月大蝗

自幽并司冀至於秦雍草木牛馬毛鬣皆盡是時天下
兵亂漁獵黔黎存亡所寄惟司馬越荀晞而已競爲暴
刻經畧無章故有此孽 愍帝建興四年五月大蝗去

歲劉曜頻攻北地馮翊趙允等悉衆禦之卒爲劉曜所

破西京遂潰 五年帝在平陽司冀青雍蝻 元帝太
興元年六月蘭陵合鄉蝗害禾稼乙未東莞蝗蟲縱橫
三百里害苗稼七月東海彭城下邳淮西郡蝗蟲害禾
豆八月冀青徐三州蝗食生草盡至於二年是時中州
淪喪暴亂滋甚也 二年五月淮陵臨淮淮南安豐廬
江等五郡蝗蟲食秋麥是月癸丑徐州及揚州江西諸
郡蝗吳郡百姓多餓死去年王敦并領荊州苛暴之釁
自此興矣 孝武帝太元十五年八月兖州蝗是時慕
容氏逼河南征戍不已故有斯孽 十六年五月飛蝗
從南來集堂邑縣界害苗稼是年春發江州兵營甲士

三千人家口六七千配護軍及東宮後尋散亡殆盡又
邊將連有征役故有斯孽

劉聰末年河東大蝗唯不食黍豆鄴準率部人收而
埋之哭聲聞於十餘里後乃鑽土飛出復食黍豆
石虎時河朔大蝗初穿地而生二旬則化狀若蠶七
八日而臥四日蛻而飛彌亘百草唯不食三豆及麻
苻健時蝗蟲大起自華陰至隴山食百草無遺牛馬
相噉毛

宋文帝元嘉三年秋旱且蝗

梁武帝大同初蝗籬門松栢葉皆盡京房易飛候曰食

祿不益聖化天視以蟲蟲無益於人而食萬物也時公卿皆以虛澹爲美不親職事無益食物之應也

北齊文宣天保八年河北六州河南十二州蝗畿人皆祭之時外築長城內修三臺役者不止 九年山東又蝗 十年幽州大蝗 河清二年并汾晉東雍南汾五州蟲旱傷稼

後周武帝建德二年關中大蝗

隋文帝開皇十六年并州蝗時秦孝王俊哀刻百姓盛修邸第後獲譴死

唐高祖武德六年夏州蝗蝗之殘民若無功而祿者然

皆貪撓之所生先儒以爲人主失禮煩苛則旱魚螺變爲蟲蝗故以爲魚孽 太宗貞觀二年六月京畿旱蝗

太宗在苑中掇蝗祝之曰人以穀爲命百姓有過在予一人但當蝕我無害百姓將吞之侍臣懼帝致疾遽以

爲諫帝曰所冀移災朕躬何疾之避遂吞之是歲蝗不爲災 三年五月徐州蝗秋德戴廓等州 四年秋觀

兗遼等州蝗 二十一年秋渠泉二州蝗 高宗永徽元年夔絳雍同等州蝗秋陳州蝗 永淳元年三月京

畿蝗無麥苗六月雍岐隴等州蝗 武后長壽二年台建等州蝗 元宗開元三年七月河南河北蝗 四年

夏山東蝗食稼聲如風雨 二十五年貝州蝗有白鳥
數千萬羣飛食之一夕而盡禾稼不傷 代宗廣德二
年秋蝗關輔尤甚斗米千錢 德宗興元元年秋螟蝗
自山而東際於海晦天蔽野草木皆盡 貞元元年夏
蝗東自海西盡河隴羣飛蔽天旬日不息所至草木葉
及畜毛靡有孑遺餓殣枕道民蒸蝗曝颺去翅足而食
之 憲宗元和元年夏鎮冀等州蝗 穆宗長慶三年
秋洪州螟蝗害稼八萬頃 文宗開成元年夏鎮州河
中蝗害稼 二年六月魏博昭義淄青滄州兗海河南
蝗 三年秋河南河北鎮定等州蝗草木葉皆盡 五

年夏幽魏博鄆曹濮滄齊德淄青兗海河陽淮南虢陳
許汝等州螟蝗害稼占曰國多邪人朝無忠臣居位食
祿如蟲與民爭食故比年蟲蝗 武宗會昌元年七月
關東山南鄧唐等州蝗 宣宗大中八年七月劔南東
州蝗 懿宗咸通三年六月淮南河南蝗 六年八月
東都同華陝虢等州蝗 七年夏東都同華陝虢及京
畿蝗 九年江淮關內及東都蝗 十年夏陝虢等州
蝗不絕無德虐取於民之罰 僖宗乾符二年蝗自東
而西蔽天 光啓元年秋蝗自東方來羣飛蔽天 二
年荆襄蝗斗米錢三千人相食淮南蝗自西來行而不

飛浮水緣城入揚州府署竹樹幢節一夕如剪幡幟畫像皆齧去其首撲不能止旬日自相食盡

後梁太祖開平元年六月許陳汝蔡潁五州蝥生有野禽羣飛蔽空食之皆盡

後唐莊宗同光三年九月鎮州奏飛蝗害稼

晉高祖天福七年四月山東河南關西諸郡蝗害稼至

八年四月天下諸道州飛蝗害稼草木葉皆盡詔州縣

長吏捕蝗華州節度使楊彥珣雍州節度使趙瑩命百

姓捕蝗一斗以祿粟一斗賞之

時蝗旱相繼人民流遷饑者盈路關西餓殍尤

甚死者十有七八朝廷以軍食不充分命使臣諸道括借粟麥晉氏自此衰矣

後漢隱帝乾祐元年七月青鄆兗齊濮沂密邢曹皆言

蝥生開封府奏陽武雍邱襄邑等縣蝗開封尹侯益遣

人以酒肴致祭尋爲鸚鵒食之皆盡

勅禁羅弋鸚鵒以其有吞蝗之異也

二年五月博州奏有蝥生化爲蝶飛去宋州奏蝗一

夕抱草而死差官祭之復命尚書侍郎段希堯祭東嶽

太府卿劉皞祭中嶽皆慮蟲螟爲災故也

宋太祖建隆元年七月澶州蝗 二年五月濮州范縣

蝗 三年七月兗濟德磁洛五州有蝥生真定府深州

蝥蟲生 四年六月澶濮曹絳等州有蝗懷州蝗生

乾德二年四月相州蝥蟲食桑五月趙州昭慶縣有蝗

乾隆十二年校刊

物異二十

七

東西四十里南北二十里是夏河南河北陝西諸州皆蝗 三年七月諸路有蝗淄州民韓贊斷手指以祭
開寶二年八月真定府冀磁州蝗 太宗太平興國二
年六月磁州有黑蟲羣飛食桑夜出晝隱食葉殆盡閏
七月衛州蝻蟲生 六年七月河南府宋州蝗 七年
四月唐州北陽縣蝻蟲生有飛鳥食之盡河南府滑州
蝻蟲生五月大名府陝州陳州蝗七月鄆州陽穀縣蝻
蟲生 九年七月泗州蝻蟲食桑 雍熙二年四月天
長軍蝻蟲食苗 三年七月濮州鄆城縣有蝗俄自死
淳化元年四月鄆州中都縣蝻蟲生七月單州碭山

縣蝗曹州濟陰縣有蝗自北來飛亘天有聲 二年三
月亳州蝻蟲生遇雨而死六月淄澶濮州乾寧軍並蝗
生七月寧邊軍有蛤滄州蝻蟲食苗棣州有飛蝗自北
來害稼 三年六月甲申京師有蝗起東北趨西南蔽
空如雲翳日七月貝許滄沂蔡汝商兗單等州淮陽平
定靜戎軍蝗俄抱草自死 至道二年六月亳宿密州
蝗生食苗七月許州長葛陽翟二縣有蝻蟲食苗齊州
歷城長青等縣有蝗 三年七月單州蝻蟲生 真宗
景德元年八月陝濱棣州蟲害稼 二年六月京東諸
州蝻蟲生 三年八月德博州蝻生 四年九月陳州

宛邱縣鄆州東河須城二縣蝗 大中祥符二年五月
雄州蝻蝗食苗 三年六月開封府咸平尉氏二縣蝻
蟲生 四年六月開封府祥符縣有蝗七月河南府及
京東蝗生食苗葉八月開封府祥符咸平中牟陳留雍
邱封邱六縣蝗生 九年六月京畿京東西河北路蝗
蝻繼生彌覆郊野食民田殆盡入公私廬舍七月辛亥
過京師羣飛翳空至淮南趨河東及霜寒始斃 天禧
元年二月開封府京東西河北河東陝西江淮兩浙荆
湖百三十州軍蝗蝻復生多去歲蟄者和州蝗生卵如
稻粒而細六月江淮大風多吹蝗入江海或抱草木僵

死 二年四月江陰軍蝻蟲生 仁宗天聖五年七月
丙午邢洛州蝗甲寅趙州蝗不食苗是歲京兆府旱蝗
六年五月己卯河北京東蝗 明道元年十月中甲
寅濠州蝗 二年七月庚辰開封界京東西河北河東
陝西蝗 景祐元年六月乙卯開封府淄州蝗諸路募
民掘蝗子萬餘石 寶元元年六月曹濮單三州蝗
慶歷四年春淮南旱蝗京師飛蝗蔽天 神宗熙寧元
年秀州蝗 五年河北大蝗 六年四月河北諸路蝗
是歲江寧府飛蝗自江北來 七年夏開封府界及河
北路蝗七月咸平縣鸚鵡食蝗 八年八月淮西蝗陳

潁州蔽野 九年夏開封府畿京東河北陝西蝗五月
京湖南路地生黑蟲化蛾飛去全州生黑蟲食苗黃雀
來食之皆盡 元豐四年六月河北蝗秋開封府界蝗
五年夏又蝗 六年夏又蝗 五年沂州蝗 哲宗
元符元年八月高郵軍言飛蝗抱草死 徽宗崇寧元
年夏開封府界京東河北淮南等路蝗 二年諸路蝗
令有司醮祭 三年四年連歲大蝗其飛蔽日來自山
東及府界惟河北尤甚 宣和三年諸路蝗 高宗建
炎二年六月京師淮甸大蝗令長吏修醮祭 紹興二
十九年七月盱眙軍楚州處界二十里蝗為風所墜風

止復飛回淮北虜知天佑自是不敢築 三十二年六
月江東淮南北郡國蝗飛入湖州境聲如風雨自癸巳
至於七月丙申飛徧畿縣餘杭仁和錢塘皆蝗丙午蝗
入京城八月山東大蝗 江淮諸道乏食令發廩萬石以賑 癸丑頒祭醮

禮式 孝宗隆興元年七月大蝗 辛丑詔羣臣言闕失
食詔諸道暴察冤賑災蠲賦重匿災 八月壬申癸酉飛
之罰休息江淮襄蜀科調民忘凶年 蝗過都蔽天日徽宣湖三州及浙東郡縣害稼 遂下捕

九月京東大蝗襄隨蝗甚民為乏食 二年夏畿縣餘
杭大蝗 令漕臣察獄泄捕 乾道元年六月淮西蝗憲臣姚岳

貢死蝗為瑞上斥其佞坐黜 淳熙三年八月淮北飛

蝗楚州盱眙軍界如雲陣風雷者逾時遇大雨皆死稼
 用不害 九年六月滁州全椒縣和州歷陽烏江縣蝗
 乙卯飛蝗過都遇大雨墮仁和界蘆蕩茅穗令從七月
 淮甸大蝗其揚泰州窖撲蝗五千斛餘郡或日捕數十
 車羣飛絕江墮鎮江府皆害稼令淮浙郡 十年六月
 淮浙舊蝗遺育害稼 十四年七月畿縣仁和蝗蝗始
捕除之 光宗紹熙二年七月泰州蝗自高郵縣 五
不為災 年八月楚和州蝗 寧宗嘉泰二年浙西大蝗自丹陽
 入武進若煙霧蔽天其墮亘十餘里常之三縣捕八千
 餘石湖之長興捕數百石時浙東近郡亦蝗 開禧三

年夏秋旱大蝗羣飛蔽天先是浙西郡縣首種不入或
 種豆粟皆既於蝗漢志言魯宣公秋蟲以為宣無熟歲
 數有軍旅又漢武帝比年秋蝗與師征四夷之應時韓
 侂胄開邊兵禍連結故有此孽也 嘉定元年五月江
 浙大蝗乙丑上懼災 六月乙酉有事於園丘方澤且祭
 醮七月又醮效醮式於郡國 二年四月又蝗下捕五
 月丁酉令諸郡修醮祀六月辛未飛蝗入畿縣令守臣
 七年六月浙郡蝗 八年四月北境飛蝗越淮而南
 江淮郡蝗食禾苗山林草木皆盡乙卯飛蝗入畿縣已
 亥祭醮令蝗郡如式以祭是歲自夏徂秋蝗患不息諸

乾隆十二年校刊

文獻通考卷三百四

物異二十

三

道捕蝗者以千萬石計饑民競捕官以粟易之 九年五月浙東蝗丁巳令郡國酺祭令諸道部使者督捕之是歲薦饑官以粟易蝗者計千百斛及冬校比而賞罰之 十年四月楚州

蝗

螟 蚘 蚘 蚘 蚘

春秋隱公五年秋螟董仲舒劉向以為時公觀漁於棠貪利之應也劉歆又以為逆臧儂伯之諫貪利區霽以生羸蟲之孽也 八年九月螟時鄭伯以邴將易許田有貪利心京房易傳曰臣安祿茲謂貪厥災蟲蟲食根德無常茲謂煩蟲食葉不絀無德蟲食本與東作爭茲

謂不時蟲食節蔽惡生孽蟲食心 莊公二年秋螟董仲舒劉向以為先是衛侯朔出奔齊齊侯會諸侯納朔許諸侯賂齊人歸衛寶魯受之貪利應也

漢文帝後六年秋螟是歲匈奴大入上郡雲中烽火通長安遣三將軍屯邊三將屯京師

後漢章帝七八年間郡縣大螟傷稼語在魯公傳而紀不錄 時章

帝用竇皇后讒害宋梁二貴人廢皇太子 靈帝熹平

四年六月弘農三輔螟蟲為害時靈帝用中常侍曹節等讒言禁錮名士謂之黨人 中平二年七月三輔螟

蟲為害

晉武帝咸寧元年七月郡國螟九月青州又螟是月郡國有青蟲食禾稼 四年司冀兗豫荆揚郡國二十螟 九年八月郡國二十四螟九月蟲又傷秋稼時帝聽讒諛寵任賈充楊駿故有蟲蝗之災不紕無德之罰 惠帝元康三年九月帶方等六縣螟食禾葉盡 永寧元年七月梁益涼三州螟時齊王冏執政貪苛之應十月南安巴西江陽太原新興北海青蟲食禾葉甚者十傷五六十月郡國六螟

唐太宗貞觀二十一年八月萊州螟 元宗開元二十一年八月榆關蚘蚘蟲害稼入平州界有羣雀來食之

一日而盡 二十六年榆關蚘蚘蟲害稼羣雀來食之 天寶三載青州紫蟲食田有鳥食之 代宗廣德元年秋蚘蚘蟲害稼關中尤甚斗粟千錢 穆宗長慶四年絳州蚘蚘蟲害稼 文宗太和元年秋河東同虢等州蚘蚘蟲害稼 四年河南黑蟲食田

宋太祖建隆二年九月華州渭南縣蚘蚘蟲害稼 乾德六年七月階州蚘蚘蟲生 太宗太平興國二年七月邢州鉅鹿沙河二縣步屈蟲食桑麥殆盡 五年七月濰州蚘蚘蟲食稼殆盡 七年九月邠州蚘蚘蟲生 食稼 端拱二年七月施州蚘蚘蟲生害稼 真宗大

中祥符四年八月兗州好妨蟲生有蟲青色隨齧之化為水 仁宗天聖五年五月戊辰磁州蟲食桑 六年庚戌同華等州早好妨蟲食苗 高宗紹興元年秋紹興府湖州螟浙東西郡國螟多為穀災 二年台州螟 二十九年秋浙東江東西郡縣螟 三十年十月江浙郡國螟 孝宗乾道三年八月江東郡縣螟 浙諸路多以青蟲食穀穗為災 六年秋浙西江東螟 蟲為害 九年秋吉贛州臨江南安軍皆有螟 淳熙二年秋浙江淮郡縣間有螟害 四年秋昭州螟 五年昭州薦有螟 七年秋永州螟 八年秋江州螟

十二年八月平江府有蟲聚於禾穗惟油可墮一夕大雨盡滌 十四年秋江州興國軍螟 十六年秋溫州螟 寧宗慶元三年秋浙東蕭山山陰縣婺州浙西富陽鹽官淳安永興縣嘉興府皆螟 四年秋江東鉛山縣蟲食穀田無遺穗 嘉定十四年明台溫婺衢蝨 十五年秋贛州螟 十六年秋永道州螟

鼠妖

春秋成公七年正月鼯鼠食郊牛角 師古曰鼯小鼠也即今所謂甘鼠者 音改卜牛又食其角劉向以為近青祥亦牛禍也不敬而備禱之所致也昔周公制禮樂成周道故成王命魯

郊祀天地以尊周公至成公時三家始顛政魯將從此
 衰天愍周公之德痛其將有敗亡之禍故於郊祭而見
 或云鼠小蟲性盜竊鼯又其小者也牛大畜祭天尊物
 也角兵象在上君威也小小鼯鼠食至尊之牛角象季
 氏乃陪臣盜竊之人將執國命以傷君威而害周公之
 祀也改卜牛鼯鼠又食其角天重語之也重音直用反成公
 怠慢昏亂遂君臣更執於晉至於襄公晉為溴梁之會
 天下大夫皆奪其君政溴梁之會諸侯皆在而魯叔孫
 孫薑小邾之大夫其後三家逐昭公卒死於外幾絕周
 盟是奪其君政也公之祀董仲舒以為鼯鼠食郊牛皆養牲不謹也京房

易傳曰祭天不謹厥妖鼯鼠齧郊牛角 定公十五年
 正月鼯鼠食郊牛牛死劉向以為定公知季氏逐昭公
 罪惡如彼親見孔子為夾谷之會齊人歸鄆謹龜陰之
 田聖德如此反用季桓子淫於女樂而退孔子無道甚
 矣是歲五月定公薨牛死之應京房易傳曰子不子鼠
 食其郊牛 哀公元年正月鼯鼠食郊牛劉向以為天
 意汲汲於用聖人逐三家故復見戒也哀不寤身奔於
 越

漢昭帝元鳳元年九月燕有黃鼠啣其尾舞王宮端門
 中宮之王往視之鼠舞如故王使吏以酒脯祠舞不休

一日一夜死近黃祥時燕刺王且謀反將死之象也其
月發覺伏辜京房易傳曰誅不原情厥妖鼠舞門師古曰不

原情者不得其本情成帝建始四年九月長安城南有鼠啣黃

蒿栢葉上民冢栢及榆樹上為巢桐栢尤多師古曰栢本亭名

衛思后於其地葬也巢中無子皆有乾鼠矢數十時議臣以為恐

有水災鼠盜竊小蟲夜出晝匿今晝去穴而登木象賤

人將居顯貴之位也桐栢衛后園所在也其後趙皇后

自微賤登至尊與衛后同類趙后終無子而為害明年

有鳶焚巢殺子之異也師古曰鳶鴟也音弋全反天象仍見甚可畏

也仍頻也曰皆王莽竊位之象云京房易傳曰臣私祿

罔辟李奇曰辟君也擅私爵祿誣罔其君厥妖鼠巢

魏齊王正始中中山王周南為襄邑長有鼠從穴出語

曰王周南爾以某日死周南不應鼠還穴後至期更冠

幘皂衣出語曰周南汝日中當死又不應鼠復入穴斯

須更出語如向日適欲中鼠入須臾復出出入轉更數

語如前日適中鼠曰周南汝不應我復何道言絕顛蹶

而死即失衣冠取視具如常鼠按班固以為黃祥時曹

爽專政競為比周故鼠作變也

晉太康時彭蠡化為鼠見蟲異門

陳後主禎明二年四月羣鼠無數自蔡州岸入石頭淮

至青塘兩岸數日死隨流出江近青祥也京房易飛候
曰鼠無故羣居不穴衆聚者其君死未幾亡國

唐高祖武德元年秋李密王世充隔洛水相拒密營中
鼠一夕渡水盡去占曰鼠無故皆夜去邑有兵 太宗

貞觀十三年建州鼠害稼 二十一年渝州鼠害稼

高宗顯慶三年長孫無忌第有大鼠見於庭月餘出入
無常後忽然死 龍朔元年十一月洛州猫鼠同處鼠

隱伏象盜竊猫職捕齧而反與同象司盜者廢職容姦
弘道初梁州倉有大鼠長二尺餘爲猫所齧數百鼠
反嚙猫少選聚萬餘鼠州遣人捕擊殺之餘皆散去

中宗景龍元年基州鼠害稼 睿宗景雲中有蛇鼠鬪

於右威衛營東街槐樹蛇爲鼠所傷鬪者兵象 元宗

開元二年韶州鼠害稼千萬餘羣 天寶元年十月魏

郡有猫鼠同乳甚於同處 代宗大歷十三年六月隴

右節度使朱泚於兵家得猫鼠同乳以獻 懿宗咸通

十二年汾州孝義縣民家鼠多茹蒿芻巢樹上鼠穴居

去穴登木賤人將貴之象 僖宗乾符三年秋河東諸

州多鼠穴屋壞衣三月止鼠盜也天戒若曰將有盜矣

昭宗乾寧末陝州有蛇鼠鬪於南門之內蛇死而鼠
亡去

後唐潞王清泰三年三月有蛇鼠鬪於師子門外鼠殺蛇其年十二月晉高祖起兵於太原

宋太祖建隆元年夏相金均房商五州鼠食苗 二年正月商州鼠食苗 太宗太平興國七年十一月岳州鼠害稼九月京西民獻白鼠二 高宗紹興十六年廣州清遠縣韶州翁源縣英德府真陽縣鼠食稼千萬爲羣時廣東久旱凡羽鱗皆化爲鼠有獲鼠於田者腹猶蛇文漁者夜設網旦視數百鱗皆鼠自夏徂秋爲患數月方息歲爲饑 孝宗乾道九年隆興府鼠害稼千萬爲羣甚於螟蝗 淳熙五年八月淮東通泰楚高郵黑

鼠食禾田無遺穗淮民大饑時江陵府十五里外羣鼠以千萬計蔽塞通達其色黑白青黃相雜與人并行爲車馬所踐死者不可勝計凡三月乃息 光宗紹熙四年饒州民家有二小鼠食牛角三徙牛牢不免角穿肉瘡以斃春秋書鼯鼠食牛角京房易傳曰祭天不謹爲郊牛也不與民牛同占特鼠妖爾 寧宗慶元元年六月鄱陽縣民家一貓帶數十鼠行止食息皆同如母子相哺者民殺貓而鼠舐其血鼠象盜貓職捕而反相與同處司盜廢職之象也與唐龍朔洛州貓鼠同占

文獻通考卷第三百十四



